

御定全唐詩錄

土岐文庫
文庫17
W65
6



全書寺錄卷第十五

高麗



010185189223

文庫 17
W 65
6



御定全唐詩錄卷第十五

禮部侍郎臣徐倬翰林院侍讀學士臣徐元正奉

旨校刊

高適

適字達夫滄州蓨人少濩落不事生產年過五十始留意詩什每吟一篇已為好事者稱誦舉有道科授封丘尉哥舒翰表為左驍騎兵曹掌書記祿山亂拜監察御史及翰兵敗奔赴行在遷侍御史歷遷至劔南西川節度使代宗時為刑部侍郎轉散騎常侍封渤海縣侯卒謚曰忠適喜言王霸大畧務功名尚節義逢時多難以安危為己任有唐

全唐詩錄卷第十五 高適

昭和六十年二月一日贈
王以善唐氏寄

以來詩人之達者唯適而已

殷璠云常侍性拓落不拘小節恥預常科隱迹博徒才名自遠然適詩多胸臆語兼有氣骨故朝野通賞其文至如燕歌行等篇甚多奇句且余所最深愛者未知肝膽向誰是令人却憶平原君吟諷不厭矣

古體詩

寄孟五少府

秋氣落窮巷離憂兼暮蟬後時已如此高興亦徒然知君念淹泊憶我屢周旋征路見來鴈歸人悲遠天平生感千里相望在貞堅

酬岑二十主簿秋夜見贈之作

舍下蛩亂鳴居然自蕭索緬懷高秋興忽在清夜作感物我心勞涼風驚二毛池空菡萏死月出梧桐高如何異鄉縣復得交才彥汨沒嗟後時蹉跎耻相見箕山別來久魏闕誰不戀獨有江海心悠悠未嘗倦

別王徹

歸客自南楚悵然思北臨蕭條秋風暮迴首江淮深留君終日歡或為梁甫吟時輩想鵬舉他人嗟陸沈載酒登平臺贈君千里心浮雲暗長路落日有歸禽離別未足悲辛勤當自任吾知十年後季子多黃金

送韓九

惆悵別離日徘徊岐路前歸人望獨樹匹馬隨秋蟬常
與天下士許君兄弟賢良時正可用行矣莫徒然

宋中遇林慮楊十七山人因而有別

昔余涉漳水驅車行鄴西遙見林慮山蒼蒼憂天倪邂
逅逢爾曹說君彼巖棲蘿徑垂野蔓石房倚雲梯秋韭
何青青藥苗數百畦栗林隘谷口枯樹森迴谿耕耘有
山田紡績有山妻人生苟如此何必組與珪誰謂遠相
訪曩情殊不迷簷前舉醇醪竈下烹隻雞朔風忽振蕩
昨夜寒蟬啼遊子益思歸罷琴傷解攜出門盡原野白
日黯已低始驚道路難終念言笑睽因聲謝岑壑歲暮
一攀躋

同諸公登慈恩寺浮圖

香界泯羣有浮圖豈諸相登臨駭孤高披拂欣大壯言
是羽翼生迴出虛空上頓疑身世別乃覺形神王宮闕
皆戶前山河盡簷向秋風昨夜至秦塞多清曠千里何
蒼蒼五陵鬱相望盛時慙阮步末宦知周防輸效獨無
因斯焉可遊放

登廣陵棲靈寺塔

淮南富登臨茲塔信奇最直上造雲族憑虛納天籟迴
然碧海西獨立飛鳥外始知高興盡適與賞心會連山
黯吳門喬木吞楚塞城池滿牕下物象歸掌內遠思駐
江帆暮情結春靄軒車疑蠢動造化資大塊何必了無

身然後知所退

同韓四薛三東亭翫月

遠遊悵不樂茲賞吾道存欵曲故人意辛勤清夜言東
亭何寥寥佳境無朝昏堦墀近洲渚戶牖當郊原矧乃
窮周旋游時怡討論樹陰蕩瑤瑟月氣延清樽明河帶
飛鴈野火連荒村對此更愁予悠哉懷故園

宓公琴臺詩

小序

甲申歲適登子賤琴臺賦詩三首首章懷宓公
之德千祀不朽次章美太守李公能嗣子賤之政
政再造琴臺末章多邑宰崔公能思子賤之政
宓子昔為政鳴琴登此臺琴和人亦閑千載稱其才臨

眺忽悽愴人琴安在哉悠悠此天壤唯有頌聲來
邗伯感遺事慨然建琴堂乃知靜者心千載猶相望入
室想其人出門何茫茫唯見白雲合東鄰鄒魯鄉
皤皤邑中老自誇邑中理何必升君堂然後知君美開
門無犬吠早卧常晏起昔人不忍欺今我還復爾

李雲南征蠻詩

并序

天寶十一載有詔伐西南夷右相楊公兼節制
之寄乃奏前雲南太守李宓涉海自交趾擊之
道路險艱往復數萬里蓋百王所未通也十二
載四月至於長安君子是以知廟堂使能而李
公効節適忝斯人之舊因賦是詩

聖人赫斯怒詔伐西南戎肅穆廟堂上深沈節制雄遂
令感激士得建非常功料死不料敵顧恩寧顧終鼓行
天海外轉戰蠻夷中梯巘近高鳥穿林經毒蟲鬼門無
歸客北戶多南風蜂蠆隔萬里雲雷隨九攻長驅大浪
破急擊群山空餉道忽已遠懸軍垂欲窮精誠動白日
憤薄連蒼穹野食掘田鼠晡餐兼熨僮收兵列亭堠拓
地彌西東臨事耻苟免履危能飭躬將星獨照耀邊色
何溟濛瀘水夜可涉交州今始通歸來長安道召見甘
泉宮廉藺若未死孫吳知暗同相逢論意氣慷慨謝深
衷

宋中

梁王昔全盛賓客復多才悠悠一千年陳跡唯高臺寂
寞向秋草悲風千里來

朝臨孟諸上忽見芒碭間赤帝終已矣白雲長不還時
清更何有禾黍徧空山

梁苑白日暮梁山秋草時君王不可見修竹令人悲九
月桑葉盡寒風鳴樹枝

登高臨舊國懷古對窮秋落日鴻雁度寒城砧杵愁昔
賢不復有行矣莫淹畱

逍遙漆園吏冥沒不知年世事浮雲外閒居大道邊古
來同一馬今我亦忘筌

自淇涉黃河途中作

川上常極目世情今已閒去帆帶落日征路隨長山親
友若雲霄可望不可攀於茲任所愜浩蕩風波間
清晨泛中流羽族滿汀渚黃鵠何處來昂藏寡儔侶飛
鳴無人見飲啄豈得所雲漢爾固知胡爲不輕舉
野人頭盡白與我忽相訪手持青竹竿日暮淇水上雖
老美容色雖貧亦閒放釣魚三十年中心無所向
南登滑臺上却望河淇間竹樹夾流水孤城對遠山念
茲川路濶羨爾沙鷗閒長想別離處猶無音信還
東入黃河水茫茫汎紆直北望太行山峩峨半天色山
河相映帶深淺未可測自昔有賢才相逢不相識
秋日登滑臺臺高秋已暮獨行既未愜懷土悵無趣晉

宋何蕭條羌胡散馳驚當時無戰畧此地即邊戍兵革
徒自勤山河孰云固乘閒喜臨眺感物傷遊寓惆悵落
日前飄飄遠帆處北風吹萬里南鴈不知數歸意方浩
然雲沙更迴互

朝從北岸來泊船南河許試共野人言深覺農夫苦去
秋雖薄熟今夏猶未雨耕耘日勤勞租稅兼瀉鹵園蔬
空寥落產業不足數尚有獻芹心無因見明主

我行倦風湍輟棹將問津空傳歌瓠子感慨獨愁人孟
夏桑葉肥穠陰夾長津蠶農有時節田野無閒人臨水
狎漁樵望山懷隱淪誰能去京洛顛顛對風塵

朝景入平川川長復垂柳遙看魏公墓突兀前山後憶

昔大業時群雄角奔走伊人何電邁獨立風塵首傳檄
舉敖倉擁兵屯洛口連營一百萬六合如可有方項終
比肩亂隋將假手力爭固難恃驕戰曷能久若使學蕭
曹功名當不朽

皤皤河濱叟相遇似有恥輟榜聊問之答言盡終始一
生雖貧賤九十年未死且喜對兒孫彌慙遠城市結廬
黃河曲垂釣長河裏漫漫望雲沙蕭條聽風水所思強
飯食永願在鄉里萬事吾不知其心只如此

登隴

隴頭遠行客隴上分流水流水無盡期行人未云已淺
才登一命孤劍通萬里豈不思故鄉從來感知已

哭單父梁九少府

開篋淚沾臆見君前日書夜臺今寂寞猶是子雲居疇
昔貪靈竒登臨賦山水同舟南浦下望月西江裏契濶
多別離綢繆到生死九原即何處萬事皆如此晉山徒
嗟峨斯人已冥冥常時祿且薄歿後家復貧妻子在遠
道弟兄無一人十上多苦辛一官常自哂青雲將可致
白日忽先盡唯有身後名空留無遠近

行路難

長安少年不少錢能騎駿馬鳴金鞭五侯相逢大道邊
美人絃管爭流連黃金如斗不敢惜片言如山莫棄捐
安知顛顛讀書者暮宿靈臺私自憐

君不見富家翁舊時貧賤誰比數一朝金多結豪貴百
事勝人健如虎子孫成行滿眼前妻能管絃妾歌舞自
矜一身忽如此却笑傷人獨愁苦東鄰少年安所如席
門窮巷出無車有才不肯學干謁何用年年空讀書

古大梁行

古城莽蒼饒荆榛驅馬荒城愁殺人魏王宮觀盡禾黍
信陵賓客隨灰塵憶昨雄都舊朝市軒車照耀歌鍾起
軍容帶甲三十萬國步連營一千里全盛須臾那可論
高臺曲池無復存遺墟但有狐狸迹古地空餘草木根
暮天搖落傷懷抱撫劍悲歌對秋草俠客猶傳朱亥名
行人尚識夷門道白壁黃金萬戶侯寶刀駿馬填山丘

年代淒涼不可問往來唯見水東流

邯鄲少年行

邯鄲城南游俠子自矜生長邯鄲裏千場縱博家仍富
幾處報讐身不死宅中歌笑日紛紛門外車馬常如雲
未知肝膽向誰是令人却憶平原君君不見今人交態
薄黃金用盡還疎索以茲感歎辭舊遊更於時事無所
求且與少年飲美酒往來射獵西山頭

燕歌行

并序

開元二十六年客有從御史大夫張公出塞而
還者作燕歌行以示適感征戍之事因而和焉
漢家烟塵在東北漢將辭家破殘賊男兒本自重橫行

天子非常賜顏色，搃金伐鼓下榆關。旌旆逶迤碣石間，
校尉羽書飛瀚海，單于獵火照狼山。山川蕭條極邊土，
鐵騎憑陵雜風雨。戰士軍前半死生，美人帳下猶歌舞。
大漠窮秋塞草腓，孤城落日鬪兵稀。身當恩遇常輕敵，
力盡關山未解圍。鐵衣遠戍辛勤久，玉筋應啼別離後。
少婦城南欲斷腸，征人薊北空回首。邊庭飄颻那可度，
絕域蒼茫無所有。殺氣三時作陣雲，寒聲一夜傳刁斗。
相看白刃雪紛紛，死節從來豈顧勳。君不見沙場征戰
苦，至今猶憶李將軍。

人日寄杜二拾遺

人日題詩寄草堂，遙憐故人思故鄉。柳條弄色不忍見，

梅花滿枝空斷腸。身在遠藩無所預，心懷百憂復千慮。
今年人日空相憶，明年人日知何處。一卧東山三十春，
豈知書劍老風塵。龍鍾還忝二千石，愧爾東西南北人。

九日酬顏少府

簷前白日應可惜，籬下黃花爲誰有。行子迎霜未授衣，
主人得錢始沽酒。蘇秦顛顛人多厭，蔡澤棲遲世看醜。
縱使登高只斷腸，不如獨坐空搔首。

送別

昨夜離心正鬱陶，三更白露西風高。螢飛木落何淅瀝，
此時夢見西歸客。曙鐘寥亮三四聲，東鄰嘶馬使人驚。
攬衣出戶一相送，唯見歸雲縱復橫。

送渾將軍出塞

將軍族貴兵且強漢家已是渾邪王子孫相承在朝野
至今部曲燕支下控弦盡用陰山兒登陣長騎大宛馬
銀鞍玉勒繡螭弧每逐嫖姚破骨都李廣從來先將士
衛青未肯學孫吳傳有沙場千萬騎昨日邊庭羽書至
城頭畫角三四聲匣裏寶刀晝夜鳴意氣能甘萬里去
辛勤動作一年行黃雲白草無前後朝建旌旄夕刁斗
塞下應多俠少年關西不見春楊柳從軍借問所從誰
擊劍酣歌當此時遠別無輕繞朝策平戎早寄仲宣詩

封丘作

我本漁樵孟諸野一生自是悠悠者乍可狂歌草澤中

寧堪作吏風塵下祇言小邑無所為公門百事皆有期
拜迎官長心欲碎鞭撻黎庶令人悲歸來向家問妻子
舉家盡笑今如此生事應須南畝田世情付與東流水
夢想舊山安在哉為銜君命日遲迴乃知梅福徒為爾
轉憶陶潛歸去來

別韋參軍

二十解書劍西遊長安城舉頭望君門屈指取公卿國
風冲融邁三五朝廷歡樂彌寰宇白璧皆言賜近臣布
衣不得干明主歸來洛陽無負郭東過梁宋非吾土兔
苑為農歲不登鴈池垂釣心長苦世人向我同衆人唯
君於我最相親且喜百年有交態未嘗一日辭家貧彈

碁擊筑白日晚縱酒高歌楊柳春歡娛未盡分散去使
我惆悵驚心神丈夫不作兒女別臨岐涕淚沾衣巾

送田少府貶蒼梧

沈吟對遷客惆悵西南天昔為一官未得意今向萬里
令人憐念茲斗酒成睽間停舟歎君日將晏遠樹應憐
北地春行人却羨南歸雁丈夫窮達未可知看君不合
長數奇江山到處堪乘興楊柳青青那足悲

賦得還山吟送沈四山人

還山吟天高日暮寒山深送君還山識君心人生老大
須恣意看君解作一生事山間偃仰無不至石泉淙淙
若風雨桂花松子常滿地賣藥囊中應有錢還山服藥

又長年白雲勸盡杯中物明月相隨何處眠眠時憶問
醒時事夢魂可以相周旋

近體詩

醉後贈張九旭

世上謾相識此翁殊不然興來書自聖醉後語尤顛白
髮老閒事青雲在目前牀頭一壺酒能更幾回眠

途中寄徐錄事

比以王
書見贈

落日風雨至秋天鴻雁初離憂不堪比旅館復何如君
又幾時去我知音信疎空多篋中贈長見右軍書

別馮判官

碣石遼西地漁陽薊北天關山唯一道雨雪盡三邊才

子方為客將軍正渴賢遙知幕府下書記日翩翩

送劉評事充朔方判官賦得征馬嘶

征馬向邊州蕭蕭嘶不休思淡應帶別聲斷為兼秋岐
路風將遠關山月共愁贈君從此去何日大刀頭

送鄭侍御謫閩中

謫去君無限閩中我舊過大都秋雁少只是夜猿多東
路雲山合南天瘴癘和自當逢雨露行矣慎風波

送李侍御赴安西

行子對飛蓬金鞭指鐵驄功名萬里外心事一杯中
障燕支北秦城太白東離魂莫惆悵看取寶刀雄

使青夷軍入居庸

匹馬行將久征途去轉難不知邊地別祇訝客衣單
冷泉聲苦山空木葉乾莫言關塞極雲雪尚漫漫

信安王幕府詩

并序

開元二十年國家有事林胡詔禮部尚書信安
王總戎大舉時考功郎中王公司勳郎中劉公
主客郎中魏公侍御史李公監察御史崔公咸
在幕府詩以頌美數公見於詞凡三十韻

雲紀軒皇代星高太白年廟堂咨上策幕府制中權
磐石藩維固昇壇禮樂先國章榮印綬公服貴貂蟬
樂善旌深德輸忠格上元剪桐光寵錫題劍美貞堅
聖祚雄圖廣師貞武德虔雷霆七校發旌旆五營連
華省徵羣

又霜臺舉二賢豈伊公望遠曾是茂才遷並秉韜鈴術
兼該翰墨筵帝思麟閣像臣獻柏梁篇振玉登遼甸縱
金歷薊孺度河飛羽檄橫海泛樓船北伐聲逾邁東征
務以專講戎喧涿野料敵靜居延軍勢持三畧兵戎自
九天朝瞻授鉞去時聽偃戈旋大漠風沙裏長城雨雪
邊雲端臨碣石波際隱朝鮮夜壁衝高斗寒空駐綵旃
倚弓元菟月飲馬白狼川庶物隨交泰蒼生解倒懸四
郊增氣象萬里絕風煙關塞鴻勳著京華甲第全落梅
橫吹後春色凱歌前直道常兼濟微才獨棄捐曳裾誠
已矣投筆尚悽然作賦同元淑能詩匪仲宣雲霄不可
望空欲仰神仙

送柴司戶充劉卿判官之嶺外

嶺外資雄鎮朝端寵節旄月卿臨幕府星使出詞曹海
對羊城濶山連象郡高風霜驅瘴癘忠信涉波濤別恨
隨流水交情脫寶刀有才無不適行矣莫徒勞

陪竇侍御泛靈雲池

白露時先降清川思不窮江湖仍塞上舟楫在軍中舞
換臨津樹歌饒向晚風夕陽連積水邊色滿秋空乘興
宜投轄邀歡莫避驄誰憐持弱羽猶欲伴鷓鴣

陪竇侍御靈雲南亭宴詩

并序

涼州近塞高下其池亭蓋以耀蕃落也幕府董
帥雄勇徑踐戎庭自陽關而西猶枕席矣軍中

無事君子飲食宴樂宜哉白簡在邊清秋多興
况水具舟楫山兼亭臺始臨泛而寫煩俄登陟
以寄傲絲桐徐奏林木更爽觴葡萄以遞歡指
蘭茝而可掇胡天一望雲物蒼然雨蕭蕭而牧
馬聲斷風嫋嫋而邊歌幾處又足悲矣負外李
公曰七日者何牛女之夕也夫賢者何得謹其
時請賦南亭詩列之於後

人幽宜眺聽目極喜亭臺風景知愁在關山憶夢迴
言殊語默何意忝遊陪連唱波瀾動冥搜物象開新秋
歸遠樹殘雨擁輕雷簷外長天盡樽前獨鳥來常吟塞
下曲多謝幕中才河漢徒相望嘉期安在哉

東平別前衛縣李冢少府

黃鳥翩翩楊柳垂春風送客使人悲怨別自驚千里外
論交却憶十年時雲開汶水孤帆遠路遶梁山匹馬遲
此地從來可乘輿留君不住益淒其

夜別韋司士

得城字

高館張燈酒復清夜鐘殘月鴈歸聲只言啼鳥堪求侶
無那春風欲送行黃河曲裏沙為岸白馬津邊柳向城
莫怨他鄉暫離別知君到處有逢迎

送李少府貶峽中王少府貶長沙

嗟君此別意何如駐馬銜杯問謫居巫峽啼猿數行淚
衡陽歸雁幾封書青楓江上秋天遠白帝城邊古木疎

聖代即今多雨露暫時分手莫躊躇

重陽

節物驚心兩鬢華東籬空繞未開花百年將半仕三已
五畝就荒天一涯豈有白衣來剝啄一從烏帽自欹斜
真成獨坐空搔首門柳蕭蕭噪暮鴉

田家春望

出門何所見春色滿平蕪可歎無知己高陽一酒徒

九曲詞

鐵騎橫行鐵嶺頭西看邏迖取封侯青海只今將飲馬
黃河不用更防秋

營州歌

營州少年厭原野狐裘蒙茸獵城下魯酒千鍾不醉人
胡兒十歲能騎馬

塞上聽吹笛

雪淨胡天牧馬還月明羌笛戍樓間借問梅花何處落
風吹一夜滿關山

別董大

十里黃雲白日曛北風吹鴈雪紛紛莫愁前路無知己
天下誰人不識君

聽張立本女吟

危冠廣袖楚宮妝獨步閒庭逐夜涼自把玉釵敲砌竹
清歌一曲月如霜

除夜

旅館寒燈獨不眠
客心何事轉悽然
故鄉今夜思千里
愁鬢明朝又一年

李頎

頎東川人開元十三年賈季鄰榜進士調新鄉尉
殷璠云頎詩發調既新修詞亦秀雜歌尤善元理
最長惜其偉才只到黃綬故論其家數往往高於
衆作

古體詩

漁父歌

白首何老人
蓑笠蔽其身
避世長不仕
釣魚清江濱
浦

沙明濯足山月靜
垂綸寓宿湍與瀨
行歌秋復春
持竿湘岸竹
蒸火蘆洲薪
綠水飯香稻
青荷包紫鱗
於中還自樂
所欲全吾真
而笑獨醒者
臨流多苦辛

東京寄萬楚

濩落久無用
隱身甘采薇
仍聞薄宦者
還事田家衣
頰水日夜流
故人相見稀
春山不可望
黃鳥東南飛
濯足豈長往
一樽聊可依
了然潭上月
適我胸中機
在昔同門友
如今出處非
優游白虎殿
偃息青瑣闈
且有薦君表
當看攜手歸
寄書不待面
蘭茝空芳菲

寄焦鍊師

得道凡百歲
燒丹惟一身
悠悠孤峯頂
日見三花春
白

鶴翠微裏黃精幽澗濱始知世上客不及山中人仙境
若在夢朝雲如可親何由覩顏色揮手謝風塵

贈張旭

張公性嗜酒豁達無所營皓首窮草隸時稱太湖精露
頂據胡牀長叫三五聲興來灑素壁揮筆如流星下舍
風蕭條寒草滿戶庭問家何所有生事猶浮萍左手持
蟹螯右手執丹經瞪目視霄漢不知醉與醒諸賓且方
坐旭日臨東城荷葉裏江魚白甌貯香秔微祿心不屑
放神於八紘時人不識者即是安期生

登首陽山謁夷齊廟

古人已不見喬木竟誰過寂莫首陽山白雲空復多蒼

苔歸地骨皓首采薇歌畢命無怨色成仁其若何我來
入遺廟時候微清和落日弔山鬼回風吹女蘿石門正
西豁引領望黃河千里一飛鳥孤光東逝波驅車層城
路惆悵此巖阿

謁張果先生

先生谷神者甲子焉能計自說軒轅師於今幾千歲寓
遊城郭裏浪跡希夷際應物雲無心逢時舟不繫餐霞
斷火粒野服兼荷製白雪淨肌膚青松養身世韜精殊
豹隱鍊骨同蟬蛻忽去不知誰偶來寧有契二儀齊壽
考六合隨休憇彭聃猶嬰孩松期且微細嘗聞穆天子
更憶漢皇帝親屈萬乘尊將窮四海裔車徒徧草木錦

帛招談說八駿空往還三山轉虧蔽吾君感至德元老
欣來詣受籙金殿開清齋玉堂閉笙歌迎拜首羽帳崇
嚴衛禁柳垂香鑪宮花拂仙袂祈年寶祚廣致福蒼生
惠何必待龍髯鼎成方取濟

光上座廊下衆山五韻

名嶽在廡下吾師居一牀每聞楞伽經只對清翠光百
谷聚雪色莓苔侵屋梁氣盤古壁轉勢引幽壑長願遊
薜葉下日見金鑪香

宋少府東谿泛舟

登岸還入舟水禽驚笑語晚葉低衆色濕雲帶殘暑落
日乘醉歸谿流復幾許

與諸公遊濟瀆泛舟

濟水出王屋其源來不窮泫泉數眼沸平地流清通皇
帝崇祀典詔書視三公分官禱靈廟奠璧沈河宮神應
每如答松篁氣葱龍蒼螭送飛雨赤鯉噴迴風灑酒布
瑤席吹簫下玉童元冥掌陰事祝史告年豐百谷趨潭
底三光懸鏡中淺深露沙石蘋藻生虛空晚景臨汎美
亭臯輕靄紅晴山傷舟楫白鷺驚絲桐我本家潁北開
門見維嵩焉知松峯外又有天壇東左手正接羅浩歌
眇青穹夷猶傲清吏偃仰狎漁翁對此川上閑非君誰
與同霜凝遠村渚月淨蒹葭叢茲境信難遇為歡殊未
終淹留悵言別煙嶼夕微濛

贈別高三十五

五十無產業心輕百萬資屠酤亦與羣不問君是誰飲
酒復垂釣狂歌兼詠詩焉知漢高士莫識越鴟夷寄跡
棲霞山蓬頭睢水湄忽然辟命下衆謂趨丹墀沐浴著
賜衣西來馬行遲能令相府重且有函關期僂俛從寸
祿舊遊梁宋時皤皤邑中叟相候髯如絲官舍柳林靜
河梁杏葉滋摘芳雲景晏把手秋蟬悲小縣情未愜折
腰君莫辭吾觀主人意不久召京師

送馬錄事赴永陽

子為郡從事主印清淮邊談笑一州裏從容羣吏先手
持三尺令遣決如流泉太守既相許諸公誰不然孤城

連海樹萬室帶山烟春日谿湖淨芳洲葭菼連炊秔蟹
螯熟下筋鱸魚鮮野鶴宿簷際楚雲飛面前聽歌送離
曲且駐木蘭船贈爾八行字當聞佳政傳

臨別送張諲入蜀

出門便為客惘然悲徒御四海維一身茫茫欲何去經
山復歷水百恨將千慮劍閣望梁州是君斷腸處孤雲
傷客心落日感君深夢裏蕪葭渚天邊橘柚林蜀江流
不測蜀路險難尋木有相思號猿多愁苦音莫向禺山
隱禺山地非近故鄉可歸來眼見芳菲盡

不調歸東川別業

寸祿言可取託身將見遺慙無匹夫志悔與名山辭紱

晁謝知已林園多後時葛巾方濯足蔬食但垂帷十室
對河岸漁樵祇在茲青郊香杜若白水映茅茨晝景徹
雲樹夕陰澄古逵渚花獨開晚田鶴靜飛遲且復樂生
事前賢為我歸清歌聊鼓楫永日望佳期

晚歸東園

出郭喜見山東行亦未遠夕陽帶歸路靄靄秋稼晚樵
者乘霽歸野夫及星飯請謝朱輪客垂竿不復返

裴尹東谿別業

公才廊廟器官亞河南守別墅臨都門驚湍激前後舊
交與羣從十日一攜手幅巾望寒山長嘯對高柳清歡
信可尚散吏亦何有岸雪青城陰水光遠林首閒觀野

人筏或飲川上酒幽雲澹徘徊白鷺飛左右庭竹垂卧
內村煙隔南阜始知物外情簪紱同芻狗

無盡上人東林禪居

草堂每多暇時謁山僧門所對但羣木終朝無一言我
心愛流水此地臨清源含吐山上日蔽虧松外村孤峯
隔身世百衲老寒暄禪戶積朝雪花龕來暮猿顧余守
耕稼十載隱田園蘿篠慰春汲巖潭恣討論洩雲豈知
限至道莫撥元且願啓關鎖於焉微尚存

題綦母校書所居

常稱挂冠吏昨日歸滄洲行客暮帆遠主人庭樹秋豈
伊問天命但欲為山遊萬物我何有白雲空自幽蕭條

江海上日夕見丹丘生事非漁釣賞心隨去留惜哉曠
微月欲濟無輕舟倏忽令人老相思河水流

題盧道士房

秋砧響落木共坐茅君家惟見兩童子林前汲井華空
壇靜白日神鼎飛丹砂塵尾拂霜草金鈴搖霽霞上章
人世隔看奕桐陰斜稽首問仙要黃精堪餌花

古從軍行

白日登山望烽火黃昏飲馬傍交河行人刁斗風沙暗
公主琵琶幽怨多野雲萬里無城郭雨雪紛紛連大漠
胡鴈哀鳴夜夜飛胡兒眼淚雙雙落聞道玉門猶被遮
應將性命逐輕車年年戰骨埋荒外空見蒲桃入漢家

古行路難

漢家名臣楊德祖四代五公享茅土父子兄弟綰銀黃
躍馬鳴珂朝建章火浣單衣繡方領茱萸錦帶玉盤囊
賓客填街復滿座片言出口生輝光世人逐勢爭奔走
瀝膽隳肝惟恐後當時一顧登青雲自謂生死長隨君
一朝謝病還鄉里窮巷蒼苔絕知己秋風落葉閉重門
昨日論交竟誰是薄俗嗟嗟難重陳深山麋鹿可為隣
魯連所以蹈東海古往今來稱達人

緩歌行

小來託身攀貴遊輕財破產無所憂暮擬經過石渠署
朝將出入銅龍樓結交杜陵輕薄子謂言可生復可死

一沈一浮會有時棄我翻然如脫屣男兒立身須自強
十年閉戶潁水陽業就功成見明主擊鐘鼎食坐華堂
二八蛾眉梳隨馬美酒清歌曲房下文昌宮中賜錦衣
長安陌上退朝歸五陵賓從莫敢視三省官僚揖者稀
早知今日讀書是悔作從前任俠非

琴歌

主人有酒歡今夕請奏鳴琴廣陵客月照城頭烏半飛
霜淒萬樹風入衣銅鑪華燭增輝初彈淥水後楚妃
一聲已動物皆靜四座無言星欲稀清淮奉使千餘里
敢告雲山從此始

放歌行答從弟墨卿

小來好文耻學武世上功名不解取雖沾寸祿已後時
徒欲出身事明主柏梁賦詩不及宴長楸走馬誰相數
斂迹俛眉心自甘高歌擊節聲半苦由是蹉跎一老夫
養雞牧豕城東隅空歌漢代蕭相國肯事霍家馮子都
徒爾當年聲籍籍濫作詞林兩京客故人斗酒安陵橋
黃鳥春風洛陽陌吾家令弟才不羈五言破的人共推
興來逸氣如濤湧千里長江歸海時別離短景何蕭索
佳句相思能間作舉頭遙望魯陽山木葉紛紛向人落

王母歌

武皇齋戒承華殿端拱須臾王母見霓旌照耀麒麟車
羽蓋淋漓孔雀扇手指交梨遺帝食可以長生臨寓縣

頭上復戴九星冠總領玉童坐南面欲聞要言今告汝
帝乃焚香請此語若能鍊魄去三尸後當見我天皇所
顧謂侍女董雙成酒闌可奏雲和笙紅霞白日儼不動
七龍五鳳紛相迎惜哉志驕神不悅歎息馬蹄與車轍
復道歌鐘杳將暮深宮桃李飛成雪為看青玉五枝燈
蟠螭吐火光欲絕

鮫人歌

鮫人潛織水底居側身上下隨游魚輕綃文綵不可識
夜夜澄波連月色有時寄宿來城市海島青冥無極已
泣珠報恩君莫辭今年相見明年期始知萬族無不有
百尺深泉架戶牖鳥沒空山誰復望一望雲濤堪白首

欲之新鄉答崔顥綦毋潛

數年作吏家屢空誰道黑頭成老翁男兒在世無產業
行子出門如轉蓬吾屬交歡此何夕南家擣衣動歸客
銅鑪將炙相歡飲星宿縱橫露華白寒風卷葉渡滹沱
飛雪布地悲峨峨孤城日落見棲鳥馬上時聞漁者歌
明朝東路把君手臘日辭君期歲首自知寂莫無去思
敢望縣人致牛酒

送康洽入京進樂府歌

識子十年何不遇只愛歡遊兩京路朝吟左氏嬌女篇
夜誦相如美人賦長安春物舊相宜小苑蒲萄花滿枝
柳色偏濃九華殿鶯聲醉殺五陵兒曳裾此日從何所

中貴由來盡相許白袂春衫仙吏贈烏皮隱几臺郎與
新詩樂府唱堪愁御妓應傳鳩鵲樓西上雖因長公主
終須一見曲陵侯

送劉十

三十不官亦不娶時人焉識道高下房中唯有老氏經
櫪上空餘少游馬往來嵩華與函秦放歌一曲前山春
西林獨鶴引閒步南澗飛泉清角巾前年上書不得意
歸卧東窓兀然醉諸兄相繼掌青史第五之名齊驃騎
烹葵摘果告我行落日夏雲縱復橫聞道謝安掩口笑
知君不免為蒼生

別梁鎰

梁生倜儻心不羈途窮氣益長安兒回頭轉眄似鵬鷃
有志飛鳴人豈知雖云四十無祿位曾與大軍掌書記
抗辭請刃誅部曲作色論兵犯二帥一言不合龍額侯
擊劍拂衣從此棄朝朝飲酒黃公壚脫帽露頂爭叫呼
庭中犢鼻昔嘗挂懷裏琅玕今在無時人見子多落魄
共笑狂謔非遠圖忽然遣躍紫騮馬還是昂藏一丈夫
洛陽城頭曉霜白層冰峩峩滿川澤但聞行路吟新詩
不歎舉家無擔石莫言貧賤長可欺覆篲成山當有時
莫言富貴長可託木槿朝看暮還落不見古時塞上翁
倚伏由來任天作去去滄波勿復陳五湖三江愁殺人

少室雪晴送王寧

李頎

李頎

李頎

少室衆峯幾峯別一峯晴見一峯雪隔城半山連青松
素色峨峨千萬重過景斜臨不可道白雲欲盡難爲容
行人與我翫幽境北風切切吹衣冷惜別浮橋駐馬時
舉頭試望南山嶺

送陳章甫

四月南風大麥黃棗花未落桐陰長青山朝別暮還見
嘶馬出門思舊鄉陳侯立身何坦蕩虬鬚虎眉仍大顙
腹中貯書一萬卷不肖低頭在草莽東門酤酒飲我曹
心輕萬事如鴻毛醉卧不知白日暮有時空望孤雲高
長河浪頭連天黑津吏停舟渡不得鄭國遊人未及家
洛陽行子空歎息聞道故林相識多罷官昨日今如何

凌敬寺古藤歌

古藤池水盤樹根左攫右拏龍虎蹲橫空直上相陵突
丰茸離纏若無骨風雷霹靂連黑枝人言其下藏妖魘
空庭落葉作開合十月苦寒常倒垂憶昨花飛滿空殿
密葉吹香飯僧遍南階雙桐一百尺相與年年老霜霰
崔五六圖屏風各賦一物得烏孫佩刀

烏孫腰間佩兩刀刃可吹毛錦爲帶握中枕宿穹廬室
馬上割飛蠚螭塞執之魍魎誰能前氣凜清風沙漠邊
磨用陰山一片玉洗將胡地獨流泉主人屏風寫奇狀
鐵鞘金鏤儼相向回頭瞪目時一看使予心在江湖上

古意

男兒事長征少小幽燕客賭勝馬蹄下由來輕七尺殺人莫敢前鬚如蝟毛磔黃雲隴底白雪飛未得報恩不能歸遼東小婦年十五慣彈琵琶解歌舞今為羌笛出塞聲使我三軍淚如雨

鄭櫻桃歌

石季龍僭天祿擅雄豪美人姓鄭名櫻桃櫻桃美顏香且澤娥娥侍寢專宮掖後庭卷衣三萬人翠眉清鏡不得親宮軍女騎一千匹繁花照耀漳河春織成花映紅綸巾紅旗掣曳鹵簿新鳴輦走馬接飛鳥銅馱瑟瑟隨去塵鳳陽重門如意館百尺金梯倚銀漢自言富貴不可量女為公主男為王赤花雙簞珊瑚牀盤龍斗帳琥

珀光淫昏偽位神所惡滅石者陵終不悟鄴城蒼蒼白露微世事翻覆黃雲飛

送劉昱

八月寒葦花秋江浪頭白北風吹五兩誰是潯陽客鷓鴣山頭微雨晴揚州郭裏暮潮生行人夜宿金陵渚試聽沙邊有雁聲

聽董大彈胡笳聲兼寄語弄房給事

蔡女昔造胡笳聲一彈一十有八拍胡人落淚沾邊草漢使斷腸對歸客古戍蒼蒼烽火寒大荒沈沈飛雪白先拂商絃後角羽四郊秋葉驚撼撼董夫子通神明深松竊聽來妖精言遲更速皆應手將往復旋如有情空

山百鳥散還合萬里浮雲陰且晴嘶酸雛鴈失羣夜斷
絕胡兒戀母聲川為靜其波鳥亦罷其鳴烏孫部落家
鄉遠邏迤沙塵哀怨生幽音變調忽飄灑長風吹林雨
隨瓦迸泉颯颯飛木末野鹿呦呦走堂下長安城連東
掖垣鳳凰池對青瑣門高才脫畧名與利日夕望君抱
琴至

近體詩

寄鏡湖朱處士

澄霽晚流潤微風吹綠蘋鱗鱗遠峯見淡淡平湖春芳
草日堪把白雲心所親何時可為樂夢裏東山人

送人尉閩中

可歎芳菲日分為萬里情閩門折垂柳御苑聽殘鶯海
戍通閩邑江帆過楚城客心君莫問春草是王程

送盧逸人

洛陽為此別攜手更何時不復人間見祇應海上期清
谿入雲木白首卧茅茨共惜盧敖去天邊望所思

望秦川

秦川朝望迥日出正東峰遠近山河淨逶迤城闕重秋
聲萬戶竹寒色五陵松客有歸歎歎悽其霜露濃

晚歸故園

荆扉帶郊郭稼穡滿東菑倚杖寒山暮鳴梭秋葉時回
雲覆陰谷返景照霜梨澹泊真吾事清風別自茲

宿香山寺石樓

夜宿翠微半高樓聞暗泉漁舟帶遠火山磬發孤煙衣
拂雲松外門清河漢邊峯巒低枕席世界接人天靄靄
花出霧輝輝星映川東林曙鶯滿惆悵欲言旋

聖善閣送裴迪入京

雲華滿高閣苔色上鈎欄藥草空堦靜梧桐返照寒清
吟可愈疾攜手暫同歡墜葉和金磬饑鳥鳴露盤伊流
惜東別灞水向西看舊託含香署雲霄何足難

送喬琳

草綠小平津花開伊水濱今君不得意孤負帝鄉春口
不言金帛心常任屈伸阮公能飲酒陶令肯羞貧陽羨

風流地滄江遊寓人菱歌五湖遠桂樹八公隣青鳥迎
孤棹白雲隨一身潮隨秣陵上月映石頭新未可逃名
利應須在縉紳汀洲芳杜色勸爾暫垂綸

寄司勳盧負外

流澌臘月下河陽草色新年發建章秦地立春傳太史
漢宮題柱憶仙郎歸鴻欲度千門雪侍女新添五夜香
早晚薦雄文似者故人今已賦長楊

寄綦毋三

新加大邑綬仍黃近與單車去洛陽顧眄一過丞相府
風流三接令公香南川稷稻花侵縣西嶺雲霞色滿堂
共道進賢蒙上賞看君幾歲作臺郎

送魏萬之京

朝聞遊子唱離歌昨夜微霜初渡河鴻雁不堪愁裏聽
雲山況是客中過關城樹色催寒近御苑砧聲向晚多
莫見長安行樂處空令歲月易蹉跎

送李回

知君官屬大司農詔幸驪山職事雄歲發金錢供御府
晝看仙液注離宮千巖曙雪旌門上十月寒花輦路中
不覩聲名與文物自傷流滯去關東

宿瑩公禪房聞梵

花宮仙梵遠微微月隱高城鐘漏稀夜動霜林驚落葉
曉聞天籟發清機蕭條已入寒空靜颯沓仍隨秋雨飛

始覺浮生無住着頓令心地欲皈依

題璿公山池

遠公遊跡廬山岑開士幽居祇樹林石孤峯窺色相
清池白月照禪心指揮如意天花落坐卧閒房春草深
此外俗塵俱不染惟餘元度得相尋

題盧五舊居

物在人亡無見期閒庭繫馬不勝悲窓前綠竹生空地
門外青山如舊時悵望秋天鳴墜葉嶮岼枯柳宿寒鴟
憶君淚落東流水歲歲花開知是誰

寄韓鵬

為政心閒物自閒朝看飛鳥暮飛還寄書河上神明宰

羨爾城頭姑射山

白花原一作王昌齡出塞行

白花原頭望京師黃河水流無已時窮秋曠野行人絕
馬首東來知是誰

野老曝背

百歲老翁不種田惟知曝背樂殘年有時捫蝨獨搔首
目送歸鴻籬下眠

裴迪

迪初與王維崔興宗俱居終南天寶後為蜀州刺史

近體詩

春日與王右丞過新昌里訪呂逸人不遇

恨不逢君出荷蓑青松白屋更無他陶令五男曾不有
蔣生三徑枉相過芙蓉曲沼春流滿薜荔成帷晚靄多
聞說桃源好迷客不如高卧眄庭柯

孟城坳

結廬古城下時登古城上古城非疇昔今人自來往

華子岡

落日松風起還家草露晞雲光侵履跡山翠拂人衣

宮槐陌

門前宮槐陌是向欽湖道秋來山雨多葉落無人掃

陶翰

翰潤州人開元中爲禮部員外以冰壺賦得名
殷璠云歷代詞人詩筆雙美者鮮矣今陶生實爲
兼之既多興象復備風骨三百年以前方可論其
體裁

古體詩

古塞下曲

進軍飛狐北窮寇勢將變日落沙塵昏背河更一戰駢
馬黃金勒琯弓白羽箭射殺左賢王歸奏未央殿欲言
塞下事天子不召見東出咸陽門哀哀淚如霰

燕歌行

請君留楚調聽我吟燕歌家在遼水頭邊風意氣多出

身爲漢將正值戎未和雪中凌天山水上度交河大小
百餘戰封侯竟蹉跎歸來灞陵下故舊無相過雄劍委
塵匣空門唯雀羅玉簪還趙姝瑤琴付齊娥昔日不爲
樂時哉今奈何

宿天竺寺

松柏亂巖口山西微徑通天開一峯見宮闕生虛空正
殿倚霞壁千樓標石叢夜來猿鳥靜鐘梵寒雲中峰翠
映湖月泉聲亂谿風心超諸境外了與懸解同明發唯
改視朝日長崖東湖色濃蕩漾海光漸瞳矇葛仙迹尚
在許氏道猶崇獨往古來事幽懷期二公

出蕭關懷古

驅馬擊長劍行役至蕭關悠悠五原上永眺關河前北
兵三十萬此中常控弦秦城亘宇宙漢帝理旌旃刁斗
鳴不息羽書日夜傳五軍計莫就三策議空全大漠橫
萬里蕭條絕人煙孤城當瀚海落日照祈連愴矣苦寒
奏懷哉式微篇更悲秦樓月夜夜出胡天

南楚懷古

南國久蕪漫我來空鬱陶君看章華宮處處生黃蒿但
見陵與谷豈知賢與豪精魂托古木寶玉捐江臯倚棹
下晴景迴舟隨晚濤碧雲暮寥落湖上秋天高往事那
堪問此心徒自勞獨餘湘水上千載聞離騷

贈房侍御

時房公
在新安

志人固不羈與道常周旋進則天下仰已之能晏然褐
衣東府召執簡南臺先雄義每特立犯顏豈圖全謫居
東南遠逸氣吟芳荃適會寥廓趣清波更夤緣扁舟入
五湖發纜洞庭前浩蕩臨海曲超遙濟江壖徵奇忽忘
反遇興將彌年乃悟范生智足明漁父賢郡臨新安渚
佳賞此城偏日夕對層岫雲霞映晴川閒居變秋色偃
卧含貞堅倚伏自相待行藏互推遷君其振羽翮歲晏
將冲天

望太華贈盧司倉

作吏至西華乃觀三峯壯削成元氣中傑出天河上如
有飛動色不知青冥狀巨靈安在哉厥跡猶可望方此

歎行旅末由飾仙裝葱龍記星壇明滅數雲嶂良友垂
真契宿心所微尚敢投歸山吟霞徑一相訪

乘潮至漁浦

艤棹乘早潮潮來如風雨嶂高忽已屆峰暗莫及覩崩
騰心為失浩蕩目無主風停浪始開漾漾入漁浦雲景
共澄霽江山相舍吐偉哉造化工此事已終古流沫誠
足誠商歌調易苦頗因忠信全客念猶栩栩

早過臨淮

夜泊三渚風晨過臨淮島潮中海氣白城上楚雲早鱗
鱗漁浦帆泚泚蘆洲草川路日浩蕩怒焉心如擣且言
任倚伏何暇念枯槁范子名屢移遽公志常保古人去

已久此理今難道

贈鄭負外

驄馬拂繡裳按兵遼水陽西分雁門騎北逐樓煩王聞
道五軍集相邀百戰場風沙暗天起虜陣森已行儒服
揖諸將雄謀吞八荒金門來見謁朱紱生輝光數載侍
御史稍遷尚書郎人生志氣立所貴功業昌何必守章
句終年事蒼黃同時獻賦客尚在東陵傍

近體詩

新安江林

江源南去永野飯暫維梢古戍懸漁網空林露鳥巢雪
晴山脊見沙淺浪痕交自笑無謀者逢人作解嘲

全唐詩錄卷第十五
柳陌聽早鶯
忽來枝上轉還似谷中聲乍使香閨靜偏傷遠客情間
關難辨處斷續若頻驚玉勒留將久青樓夢不成千門
候曉發萬井報春生徒有知音賞慙非臯鶴鳴

御定全唐詩錄卷第十五

御定全唐詩錄卷第十六

禮部侍郎臣徐倬翰林院侍讀學士臣徐元正奉

旨校刊

王昌齡

昌齡字少伯江寧人第進士補秘書郎又中宏詞
科遷汜水尉不護細行貶龍標尉其詩緒密而思
清時謂王江寧云

殷璠云元嘉以還四百年內曹劉陸謝風骨頓盡
頃有太原王昌齡魯國儲光羲克嗣厥迹且兩賢
氣同體別而王稍聲峻余嘗覩王公長平伏冤又
弔枳道賦仁有餘也奈何晚節不矜細行謗議沸

王昌齡

騰垂歷遐荒使知音者歎息

古體詩

古意

桃花四面發桃葉一枝開欲暮黃鸝轉傷心玉鏡臺清
箏向明月半夜春風來

塞下曲

蟬鳴空桑林八月蕭關道出塞入塞寒處處黃蘆草從
來幽并客皆共塵沙老莫學遊俠兒矜誇紫騮好
飲馬渡秋水水寒風似刀平沙日未沒黯黯見臨洮昔
日長城戰咸言意氣高黃塵是今古白骨亂蓬蒿

從軍行

向夕臨大荒朔風軫歸慮平沙萬里餘飛鳥宿何處朔
騎獵長原翩翩傍河去邊聲搖白草海氣生黃霧百戰
苦風塵十年履霜露雖投定遠筆未坐將軍樹早知行
路難悔不理章句

放歌行

南渡洛陽津西望十二樓明堂坐天子月朔朝諸侯清
樂動千門皇風被九州慶雲從東來泱泱抱日流昇平
貴論道文墨將何求有詔徵草澤微誠將獻謀冠冕如
星羅拜揖曹與周望塵非吾事入賦且遲留幸蒙國士
識因脫負薪裘今日放歌行以慰梁甫愁但營數斗祿
奉養每豐羞願得金膏遂飛雲亦可儔

越女

越女作桂舟還將桂爲楫湖上水渺漫清江不可涉摘
取芙蓉花莫摘芙蓉葉將歸問夫壻顏色何如妾

鄭縣宿陶太公館中贈馮六元二

儒有輕王侯脫略當世務本家藍田下非爲漁弋故無
何困躬耕且欲馳永路幽居與君近出谷同所鶩昨日
辭石門五年變秋露雲龍未相感干謁亦已屢子爲黃
綬羈余忝蓬山顧京門望西嶽百里見郊樹飛雨祠上
來靄然關中暮驅車鄭城宿秉燭論往素山月出華陰
開此河渚霧清光比故人豁達展心晤馮公尚戢翼元
子仍跼步拂衣易爲高淪跡難有趣張范善終始吾等

豈不慕罷酒當涼風屈伸備冥數

聽彈風入松闕贈楊補闕

商風入我絃夜竹深有露絃悲與林寂清景不可度寥
落幽居心颼颼青松樹松風吹草白谿水寒日暮聲意
去復還九變待一顧空山多雨雪獨立君始悟

緱氏尉沈興宗置酒南谿留贈

林色與谿古深篁引幽翠山樽在漁舟棹月情已醉始
窮清源口壑絕人境異春泉滴空崖萌草拆陰地久之
風榛寂遠聞樵聲至海雁時獨飛永然滄洲意古時青
冥客滅跡淪一尉吾子躊躇心豈其紛埃事緱峯信所
尅濟北餘乃遂齊物意已會息肩理猶未卷舒形性表

脫略賢哲議仲月期角巾飯僧嵩陽寺

同從弟銷南齋翫月憶山陰崔少府

高卧南齋時開帷月初吐清輝淡水木演漾在窓戶
萼萼幾盈虛澄澄變今古美人清江畔是夜越吟苦千里
其如何微風吹蘭杜

代扶風主人答

殺氣凝不流風悲日彩寒浮埃起四遠遊子彌不歡
依然宿扶風沽酒聊自寬寸心亦未理長鋏誰能彈
主人就我飲對我還慨歎便泣數行淚因歌行路難
十五役邊地三回討樓蘭連年不解甲積日無所餐
將軍降匈奴國使沒桑乾去時三十萬獨自還
長安不信沙場苦

君看刀箭瘢鄉親悉零落塚墓亦摧殘仰攀青松枝
慟絕傷心肝禽獸悲不去路傍誰忍看幸逢休明代
寰宇靜波瀾老馬思伏櫪長鳴力已殫少年與運會
何事發悲端天子初封禪賢良刷羽翰三邊悉如此
否泰亦須觀

東京府縣諸公與綦毋潛李頎相送至白馬寺宿
鞍馬上東門徘徊入孤舟賢豪相追送即棹千里流
赤岸落日在空波微煙收薄宦忘機括醉來即淹留
月明見古寺林外登高樓南風開長廊夏夜如涼秋
江月照吳縣西歸夢中游

秋興

王昌齡

唐詩集卷之六

信光著

四

日暮西北堂涼風洗脩木著書在南窓門館常肅肅苔
草延古意視聽轉幽獨或問余所營刈黍就寒谷

齋心

女蘿覆石壁谿水幽濛朧紫葛蔓黃花娟娟寒露中朝
飲花上露夜卧松下風雲英化爲水光采與我同日月
蕩精魄寥寥天府空

獨遊

林卧情每閑獨遊景常晏時從灞陵下垂釣往南澗手
攜雙鯉魚目送千里雁悟彼飛有適知此罹憂患放之
清冷泉因得省疎慢永懷青岑客迴首白雲間神超物
無違豈繫名與宦

就道士問周易參同契

仙人騎白鹿髮短耳何長時余采菖蒲忽見嵩之陽稽
首求丹經乃出懷中方披讀了不悟歸家問嵇康嗟余
無道骨發我入太行

趙十四兄見尋

客來舒長簟開閣延清風但有無絃琴共君盡尊中晚
來常讀易頃者欲還嵩世事何須道黃精且養蒙嵇康
殊寡識張翰獨知終忽憶鱸魚膾扁舟往江東

江上聞笛

橫笛怨江月扁舟何處尋聲長楚山外曲遶胡關溪相
去萬餘里遙傳此夜心寥寥浦淑寒響盡惟幽林不知

誰家子復奏邯鄲音水客皆擁棹空霜遂盈襟羸馬望
北走遷人悲越吟何當邊草白旌節隴城陰

觀江淮名勝圖

刻意吟雲山尤知隱淪妙遠公何為者再詣臨海嶠而
我高其風披圖得遺照援毫無逃境遂展千里眺淡掃
荆門煙明標赤城燒青葱林間嶺隱見淮海傲但指香
爐頂無聞白猿嘯沙門既云滅獨往豈殊調感對懷拂
衣胡寧事漁釣安期始遺鳥千古謝榮耀投跡庶可齊
滄浪有孤棹按河嶽英靈集微有異同今從本集

灞上閒居

鴻都有歸客偃卧滋陽村軒冕無枉顧清川照我門空

林網夕陽寒鳥赴荒園廓落時得意懷哉莫與言庭前
有孤鶴欲啄常翩翩為我銜素書弔彼顏與原二君既
不朽所以慰其魂

過華陰

雲起太華山雲山互明滅東峰始含景了了見松雪羈
人感幽棲宵映轉奇絕欣然忘所疲永望吟不輟信宿
百餘里出關玩新月何意昨來心遇物遂遷別人生屢
如此何以肆愉悅

小敷谷龍潭祠作

崖谷歎疾流地中有雷集百泉勢相蕩巨石皆却立跳
波沸崢嶸深處不可挹昏為蛟龍怒清見雲雨入靈怪

王昌齡
信光著

崇偏祠廢興自茲邑沈淫頃多昧簷宇遂不葺吾聞被
明典盛德惟世及生人載山川血食報原隰豈伊駭微
險將以循毗揖奔飛振呂梁忠信亦我習波流浸已廣
悔吝在所汲溪水有清源褰裳靡沾溼

途中作

遊人愁歲晏早起遵王畿墜葉吹未曉疎林月微微驚
禽棲不定寒獸相因依歎此霜露下復聞鴻雁飛渺然
江南意惜與中途違羈旅悲壯髮別離念征衣永圖豈
勞止明節期所歸寧厭楚山曲無人長掩扉

山行入涇州

倦此山路長傳驂問賓御林巒信回惑白日落何處徒

倚望長風滔滔引歸慮微雨隨雲收濛濛傍山去西臨
有邊邑北走盡亭戍涇水橫白煙州城隱寒樹所嗟異
風俗已自少情趣豈伊戀懷土解物且欣遇

出榔山口至壘石灣野人室中寄張十一

楸栂無冬春柯葉連峯稠陰壁下蒼黑煙含清江樓景
開獨公曳響苔隨興酬旦夕望吾友如何迅孤舟疊沙
積爲岡崩剝雨露幽石脉盡橫亘潛潭何時流旣見萬
古色頗盡一物由水與世人遠氣還草木收盈縮理無
餘今往何必憂榔土羣山高耆老如中州孰云議外降
豈是娛宦遊陰火昔所服丹砂將爾謀昨臨蘇耽井復
向衡陽求同疚求相依脫身當有籌數月仍離居風湍

成阻修野人善竹器童子能溪謳寒月波蕩漾羈鴻去悠悠

初日

初日淨金閨先照牀前暖斜光入羅幕稍稍親絲管雲髮不能梳楊花更吹滿

烏栖曲

白馬逐朱車黃昏入狹邪柳樹烏爭宿爭枝未得飛上屋東房少婦壻從軍每聽烏啼知夜分

城傍曲

秋風鳴桑條草白狐兔驕邯鄲飲來酒未消城北原平掣阜鵬射殺空營兩騰虎迴身却月佩弓弰

行路難

雙絲作綆繫銀瓶百尺寒泉轆轤上懸絲一絕不可望似妾傾心在君掌人生意氣好遷捐只重狂花不重賢宴罷調箏奏離鶴迴嬌轉盼泣君前君不見眼前事豈保須臾心勿異西山日下雨足稀側有浮雲無所寄但願莫忘前者言剉骨黃塵亦無愧行路難勸君酒莫辭煩美酒千鍾猶可盡心中片愧何可論一聞漢主思故劍使妾常嗟萬古魂

近體詩

胡笳曲

城南虜已合一夜幾重圍自有金笳引能露出塞衣聽

臨關月苦清入海風微三奏高樓曉胡人掩涕歸

潞府客亭寄崔鳳童

蕭條郡城閉旅館空寒煙秋月對愁客山鐘搖暮天新
知偶相訪斗酒情依然一宿阻長會清風徒滿川

和振上人秋夜懷士會

白露傷草木山風吹夜寒遙林夢親友高興發雲端郭
外秋聲急城邊月色殘瑤琴多遠思更爲客中彈

謁焦鍊師

中峯青苔壁一點雲生時豈意石堂裏得逢焦鍊師爐
香淨棊案松影閑瑤墀拜受長年藥翩翩西海期

宿京江口期劉脊虛不至

霜天起長望殘月生海門風靜夜潮滿城高寒氣昏故
人何寂寞久已乖清言明發不能寐徒盈江上樽

東谿玩月

一作王維詩

月從斷山口遙吐柴門端萬木紛空霽流陰中夜攢光
連虛象白氣與風露寒谷靜秋泉響巖深青靄殘澄清
入幽夢破影抱空巒恍惚琴窓裏松谿曉思難

萬歲樓

江上巍巍萬歲樓不知經歷幾千秋年年喜見山長在
日日悲看水獨流猿狄何曾離暮嶺鷓鴣空自泛寒洲
誰堪登望雲煙裏向晚茫茫發旅愁

荅武陵田太守

王昌齡

信光著

仗劍行千里微軀敢一言曾爲大梁客不負信陵恩

題灞池

晉鎌欲何之東園刈秋韭世事不復論悲歌和樵叟
開門望長川薄暮見漁者借問白頭翁垂綸幾年也

題僧房

棕櫚花滿院苔蘚入閑房彼此名言絕空中聞異香

從軍行

烽火城西百尺樓黃昏獨上海風秋更吹羌笛關山月
無那金閨萬里愁
琵琶起舞換新聲慙是關山離別情撩亂邊愁聽不盡
高高秋月照長城

關城榆葉早疎黃日暮雲沙古戰場表請回軍掩塵骨
莫教兵士哭龍荒

青海長雲暗雪山孤城遙望玉門關黃沙百戰穿金甲
不破樓蘭終不還

大漠風塵日色昏紅旗半捲出轅門前軍夜戰洮河北
已報生擒吐谷渾

玉門山嶂幾千重山北山南慙是烽人依遠戍須看火
馬踏深山不見蹤

出塞

秦時明月漢時關萬里長征人未還但使龍城飛將在
不教胡馬度陰山

騮馬新跨白玉鞍
戰罷沙場月色寒
城頭鐵鼓聲猶振
匣裏金刀血未乾

采蓮曲

吳姬越艷楚王妃
爭弄蓮舟水濕衣
來時浦口花迎入
采罷江頭月送歸
荷葉羅裙一色裁
芙蓉向臉兩邊開
亂入池中看不見
聞歌始覺有人來

春宮曲

昨夜風開露井桃
未央前殿月輪高
平陽歌舞新承寵
簾外春寒賜錦袍

西宮春怨

西宮夜靜百花香
欲捲珠簾春恨長
斜抱雲和深見月
朦朧樹色隱昭陽

西宮秋怨

芙蓉不及美人妝
水殿風來珠翠香
誰分含啼掩秋扇
空懸明月待君王

長信秋詞

金井梧桐秋葉黃
珠簾不捲夜來霜
熏籠玉枕無顏色
卧聽南宮清漏長
奉帚平明金殿開
且將團扇暫徘徊
玉顏不及寒鴉色
猶帶昭陽日影來

真成薄命久尋思
夢見君王覺後疑
火照西宮知夜飲

分明復道奉恩時

青樓曲

白馬金鞍從武皇
旌旗十萬宿長楊
樓頭小婦鳴箏坐
遙見飛塵入建章
馳道楊花滿御溝
紅妝繖綰上青樓
金章紫綬千餘騎
夫婿朝回初拜侯

青樓怨

香幃風動花入樓
高調鳴箏緩夜愁
腸斷關山不解說
依依殘月下簾鉤

浣紗女

錢塘江畔是誰家
江上女兒全勝花
吳王在時不得出

今日公然來浣紗

閨怨

閨中少婦不知愁
春日凝妝上翠樓
忽見陌頭楊柳色
悔教夫婿覓封侯

河上歌

河上老人坐古槎
合丹只用青蓮花
至今八十如四十
口道滄溟是我家

蕭駙馬宅花燭

青鸞飛入合歡宮
紫鳳銜花出禁中
可憐今夜千門裏
銀漢星槎一道通

觀獵

角鷹初下秋草稀鐵驄拋鞚去如飛少年獵得平原兔
馬後橫捎意氣歸

寄穆侍御出幽州

一從恩譴度瀟湘塞北江南萬里長莫道薊門書信少
雁飛猶得到衡陽

李四倉曹宅夜飲

霜天留後故情歡銀燭金爐夜不寒欲問吳江別來意
青山明月夢中看

龍標野宴

沅谿夏晚足涼風春酒相攜就竹叢莫道絃歌愁遠謫
青山明月不曾空

聽流人水調子

孤舟微月對楓林分付鳴箏與客心嶺色千重萬重雨
斷絃收與淚痕深

梁苑

梁園秋竹古時煙城外風悲欲暮天萬乘旌旗何處在
平臺賓客有誰憐

武陵龍興觀黃道士房問易因題

齋心問易太陽宮八卦真形一氣中仙老言餘鶴飛去
玉清壇上雨濛濛

題朱鍊師山房

叩齒焚香出世塵齋壇鳴磬步虛人百花仙醞能留客

一飯胡麻度幾春

送魏二

醉別江樓橘柚香
江風引雨入船涼
憶君遙在瀟湘月
愁聽清猿夢裏長

別李浦之京

故園今在灞陵西
江畔逢君醉不迷
小第鄰莊尚漁獵
一封書寄數行啼

送狄宗亨

秋在水清山暮蟬
洛陽樹色鳴皋煙
送君歸去愁不盡
又惜空度涼風天

送薛大赴安陸

津頭雲雨暗湘山
遷客離憂楚地顏
遙送扁舟安陸郡
天邊何處穆陵關

芙蓉樓送辛漸

寒雨連江夜入吳
平明送客楚山孤
洛陽親友如相問
一片冰心在玉壺

重別李評事

莫道秋江離別難
舟船明日是長安
吳姬緩舞留君醉
隨意青楓白露寒

盧谿主人

武陵溪口駐扁舟
谿水隨君向北流
行到荆門上三峽
莫將孤月對猿愁

送柴侍御

沅水通波接武岡送君不覺有離傷青山一道同雲雨
明月何曾是兩鄉

常建

建開元十五年進士大曆中爲盱眙尉

殷璠云高才而無貴位誠哉是言曩劉楨止於文學左思終於記室鮑昭卒於參軍今常建亦淪於一尉悲夫建詩似初發通莊却尋野徑里之外方歸大道所以其旨遠其興僻佳句輒來惟論意表至如松際露微月清光猶爲君又山光悅鳥性潭影空人心此數十句並可稱爲警策一篇盡善

者戰餘落日黃軍敗鼓聲死今與山鬼鄰殘兵哭
遼水思旣邈古詞又警絕潘岳雖云能叙悲怨未
見如此章句也

劉須溪云常建詩情景沉冥不類著色

古體詩

春詞

菀菀黃柳絲濛濛雜花垂日高紅妝卧倚對春光遲寧
知傍淇水驪裏黃金羈
翳翳陌上桑南枝交北堂美人金梯出素手自提筐非
但爲蠶饑盈盈嬌路傍

塞上曲

常建

信光善

翩翩雲中使來問太原卒百戰苦不歸
刀頭怨明月塞雲隨陣落寒日傍城沒
城下有寡妻哀哀哭枯骨

古意

牧馬古道傍道傍多古墓蕭條愁殺人
蟬鳴白楊樹回頭望京邑合沓生塵霧
富貴安可常歸來保貞素
明月照高閣綵女褰羅幕歌舞臨碧雲
簫聲沸珠箔青鸞臨南海天上雙白鶴
萬里齊翼飛意求君門樂玉霄
九重閉金鎖夜不開兩翅自無力愁鳴
雲外來態深人空貴勢屈無良媒俛仰
顧中禁東飛白玉臺

楚王竟何去獨自留巫山偏使世人見
迢迢江漢間駐舟春谿裏皆願拜靈顏
寤寐見神女金沙鳴珮環閑艷

絕世姿令人氣力微含笑竟不語化作朝雲飛

白龍窟泛舟寄天台學道者

夕映翠山深餘暉在龍窟扁舟滄浪意
淡淡花影沒西浮入天色南望對雲闕
因憶莓苔峯初陽濯元髮泉蘿兩幽映
松鶴間清越碧海瑩子神玉膏澤人骨
忽然爲枯木微興遂如兀應寂中有天明
心外無物環迴從所汎夜靜猶不歇澹然
意無限身與波上月

送楚十少府

微風吹霜氣寒影流前除落日未能別
蕭蕭林木虛愁煙閉千里仙尉其何如
因送別鶴操贈之雙鯉魚鯉魚在金盤
別鶴哀有餘心事則如此請君開素書

江上琴興

江上調玉琴一弦清一心泠泠七絃遍萬木澄幽陰能使江月白又令江水深始知枯桐枝可以徽黃金

湖中晚霽

湖廣舟自輕江天欲澄霽是時清楚望氣色猶霏矚踟躕金霞白波上日初麗煙虹落鏡中樹木生天際杳杳涯欲辨蒙蒙雪復閉言乘星漢明又覩寰瀛勢微興從此愜悠然不知歲試歌滄浪清遂覺乾坤細豈念客衣薄將期永投袂遲迴漁父間一雁聲嘹唳

白湖寺後谿宿雲門

落日山水清亂流鳴淙淙舊蒲雨抽節新花水對窓谿

中日已沒歸鳥多爲雙杉松引直路出谷臨前湖洲渚晚色靜又觀花與蒲入谿復登嶺草淺寒流速圓月明高峯春山因獨宿松陰澄初夜曙色分遠日日出城南隅青青媚川陸亂花覆東郭碧氣銷長林四郊一清影千里歸寸心前瞻王程促却戀雲門深畢景有餘興到家彈玉琴

閑齋卧雨行藥至山館稍次湖亭

旬時結陰霖簾外初白日齋目清病容心魂畏虛室閑梅照前戶明鏡悲舊質同袍四五人何不來問疾行藥至石壁東風變萌芽主人山門綠小隱湖中花時物堪獨往春帆宜別家辭君向滄海爛熳從天涯

仙谷遇毛女意知是秦宮人

谿口水石淺泠泠明藥叢入谿雙峯峻松栝疎幽風垂
嶺枝嫋嫋翳泉花濛濛黃綠霽人目路盡心彌通盤石
橫陽崖前臨殊未窮回潭清雲影瀰漫長天空水邊一
神女千歲爲玉童羽毛經漢代珠翠逃秦宮目覩神已
寓鶴飛言未終祈君青雲秘願謁黃仙翁常以耕玉田
龍鳴西頂中金梯與天接幾日來相逢

夢太白西峯

夢寐升九崖杳靄逢元君遺我太白峯寥寥辭垢氛結
宇在星漢宴林閉氤氳檐楹覆餘翠巾舄生片雲時往
谿谷間孤亭晝仍曛松峰引天影石瀨清霞文恬目緩

舟趣霽心投鳥羣春風又搖櫂潭島花紛紛

鄂渚招王昌齡張債

刈蘆曠野中沙上飛黃雲天晦無精光茫茫悲遠君楚
山隔湘水湖畔落日曛春雁又北飛音書固難聞謫居
未爲歎讒枉何由分午日逐蛟龍宜爲吊冤文翻覆古
共然名宦安足云貧士任枯槁捕魚清江濱有時荷鋤
犁曠野自耕耘不然春山隱谿澗何氤氳山鹿自有場
賢達亦顧羣二賢歸去來世上徒紛紛

晦日馬鐙曲稍次中流作

夜寒宿蘆葦曉色明西林初日在川上便澄遊子心晴
天無纖翳郊野浮春陰波靜隨釣魚舟小綠水潑出浦

見千里曠然諧遠尋扣船應漁父同唱滄浪吟

宿五度谿仙人得道處

五度谿上花生根依兩崖二月尋片雲願宿秦人家上
見懸崖崩下見白水湍仙人彈碁處石上青蘿盤無處
求玉童翳翳唯林巒前谿遇新月聊取玉琴彈

西山

一身爲輕舟落日西山際常隨去帆影遠接長天勢物
象歸餘清林巒分夕麗亭亭碧流暗日入孤霞繼渚日
遠陰映湖雲尚明霽林昏楚色來岸遠荆門閉至夜轉
清迴蕭蕭北風厲沙邊雁鷺泊宿處蒹葭蔽圓月逗前
浦孤琴又搖曳冷然夜遂深白露沾人袂

第三峯

西山第三頂茅宇依雙松杳杳欲至天雲梯昇幾重瑩
魄澄玉虛以求鸞鶴蹤逶迤非天人執節乘赤龍旁映
白日光縹緲輕霞容孤輝上煙霧餘影明心曾願與黃
麒麟欲飛而莫從因寂清萬象輕雲自中峯山暝學棲
鳥月來隨暗蒼尋空靜餘響嫋嫋雲谿鐘

張天師草堂

靈谿宴清宇傍倚枯松根花藥繞方丈瀑前飛至門四
氣閉炎熱兩崖改明昏夜深月暫皎亭午朝始暎信是
天人居幽幽寂無喧萬壑應鳴磬諸峯接一魂遂登仙
子谷因醉田中樽時節開玉書窅映飛天言心化便無

影目精焉累煩忽而舉霄漢寥落空南軒

漁浦

春至百草綠陂澤聞鷓鴣別家投釣翁今世滄浪情漚
紵為縕袍拆麻為長纓榮譽失本真怪人浮此生碧水
月自濶安流淨而平扁舟與天際獨往誰能名

空靈山應田叟

湖南無村落山舍多黃茅淳朴如太古其人居鳥巢牧
童唱巴歌野老亦獻嘲泊舟問谿口言語皆啞咬土俗
不尚農豈暇論肥瘠莫佻射禽獸浮客烹魚鮫余亦累
置人獲麋今尚苞敬君中國來願以充其庖日入聞虎
闐空山滿咆哮懷人雖共安異域終難交白水可洗心

采薇可為肴拽策背落日江風鳴梢梢

張山人彈琴

君去芳草綠西峰彈玉琴豈惟丘中賞兼得清煩襟朝
從山口還出嶺聞清音了然雲霞氣照見天地心元鶴
下澄空翩翩舞松林改絃扣商聲又聽飛龍吟稍覺此
身妄漸知仙事深其將鍊金鼎永以投吾簪

高樓夜彈箏

高樓百餘尺直上江水平明月照人苦開簾彈玉箏山
高猿狖急天靜鴻雁鳴曲度猶未終東峰霞半生

昭君基

漢宮豈不死異域傷獨沒萬里馱黃金蛾眉為枯骨迴

車夜出塞立馬皆不發共恨丹青人墳上哭明月

王將軍墓

嫖姚北伐時深入強千里戰餘落日黃軍敗鼓聲死嘗
聞漢飛將可奪單于壘今與山鬼鄰殘兵哭遼水

張公子行

日出乘釣舟嫋嫋持釣竿涉淇傍荷花驄馬閑金鞍俠
客白雲中晉間懸轆轤出門事嫖姚爲君西擊胡胡兵
漢騎相馳逐轉戰孤軍海西曲百尺旌竿沉墨雲邊笳
落日不堪聞

古意

井底玉冰洞地明琥珀轆轤青絲索仙人騎鳳披綵霞

挽上銀瓶照天閣黃金作身雙飛龍口銜明月噴芙蓉
一時渡海望不見曉上青樓十二重

古興

轆轤井上雙梧桐飛鳥銜花日將沒深閨女兒莫愁年
玉指泠泠怨金碧石榴裙裾蛺蝶飛見人不語顰蛾眉
青絲素絲紅綠絲織成錦衾當爲誰

近體詩

送陸擢

聖代多才俊陸生何考槃南山高松樹不合空摧殘九
月湖上別北風秋雨寒殷勤歎孤鳳早食金琅玕

送李十一尉臨谿

冷冷花下琴君唱渡江吟天際一帆影預懸離別心以
言神仙尉因致瑤華音回軫撫商調越谿澄碧林

宿王昌齡隱居

清谿深不測隱處惟孤雲松際露微月清光猶為君茅
亭宿花影藥院滋苔紋余亦謝時去西山鸞鶴羣

題破山寺後院

清晨入古寺初日照高林竹徑通幽處禪房花木深山
光悅鳥性潭影空人心萬籟此俱寂但餘鐘磬音

歐陽永叔云吾嘗愛建竹逕通幽處禪房花木深欲效其語作一聯久不可得始知造意者為難工也來青州得一山齋不意平生想見而不能道以言者乃為已有於是益欲希其髣髴竟爾莫獲一言

江行

平湖四無際此夜泛孤舟明月異方意吳歌令客愁鄉
園碧雲外兄弟淥江頭萬里無歸信傷心看斗牛

塞下曲

玉帛朝回望帝鄉烏孫歸去不稱王天涯靜處無征戰
兵氣銷為日月光
北海陰風動地來明君祠上望龍堆髑髏皆是長城卒
日暮沙場飛作灰

送宇文六

花映垂楊漢水清微風林裏一枝輕即今江北還如此
愁殺江南離別情

三日尋李九莊

常建

崔曙

雨歇楊林東渡頭永和三月盪輕舟故人家在桃花岸
直到門前谿水流

崔曙

曙宋州人開元二十六年登進士第以試明堂火
珠詩得名

殷璠云曙詩多歎辭要妙情意悲涼送別登樓俱
堪淚下

古體詩

山下晚晴

寥寥遠天淨谿路何空濛斜光照疎雨秋氣生白虹雲
盡山色暝蕭條西北風故林歸宿處一葉下梧桐

潁陽東谿懷古

靈谿氛霧歇皎鏡清心顏空色不映水秋聲多在山世
人久疎曠萬物皆自閑白鷺寒更浴孤雲晴未還昔時
讓王者此地閑元關無以躡高步淒涼岑壑間

早發交崖山還太室作

東林氣微白寒鳥忽高翔吾亦自茲去北山歸草堂仲
冬正三五日月遙相望肅肅過潁上矺矺辨少陽川冰
生積雪野火出枯桑獨往路難盡窮陰人易傷傷此無
衣客如何蒙雨霜

嵩山尋馮鍊師不遇

青溪訪道凌煙曙王子仙成已飛去更值空山雷雨時

雲林薄暮歸何處

近體詩

奉試明堂火珠

正位開重屋凌空出火珠夜來雙月滿曙後一星孤天
淨光難滅雲生望欲無遙知太平代國寶在名都

曙以是詩得名

明年卒惟一女名星星始悟其識也

緱山廟

遺廟宿陰陰孤峯映綠林步隨仙路遠意入道門深澗
水流年月山雲變古今祇聞風竹裏猶有鳳笙音

途中晚發

晚霽長風裏勞歌赴遠期雲輕歸海疾月滿下山遲旅

望因高盡鄉心遇物悲故林遙不見況在落花時

九日登望仙臺仍呈劉明府容

漢文皇帝有高臺此日登臨曙色開三晉雲山皆北向
二陵風雨自東來關門令尹誰能識河上仙人去不回
且欲近尋彭澤宰陶然共醉菊花杯

御定全唐詩錄卷第十六

Blank page with vertical lines for text.

御定全唐詩錄卷第十七

禮部侍郎臣徐倬翰林院侍讀學士臣徐元正奉

旨校刊

儲光義

光義兗州人登開元進士第又詔中書試文章歷
監察御史祿山反受偽署賊平貶死

顧況序云儲公進士高第與崔國輔負外綦母潛
著作同時其明年擢侍御史常建少府王龍標昌
齡皆當時之秀而侍御聲價隱隱輔轡諸子其文
篇賦論七十卷雖無雲雷之會而意氣相感扶危
急病有賢達之風挾身賊廷竟陷危邦士生不融

全唐詩錄卷第十七 儲光義

何以言命然窺其鴻黃窈窕之氣金石管磬之聲
如登瑤臺而進玉府靈篇邃宇景物寥映綠流翠
草嘉禾瑞鳥不足稱珍

殷璠云儲公詩格高調逸趣遠情深削盡常言挾
風騷之迹得浩然之氣

欒城遺言云儲詩高處似陶淵明平處似王摩詰

古體詩

野田黃雀行

噴噴野田雀不知軀體微閑穿深叢裏爭食復爭飛窮
老一積舍棗多桑樹稀無棗猶可食無桑何以衣蕭條
空倉暮相引時來歸斜路豈不捷渚田豈不肥水長路

且壞惻惻與心違

樵父詞

山北饒朽木山南多枯枝枯枝作采薪爨室私自知詰
朝礪斧尋視暮行歌歸先雪隱薜蘿迎暄卧茅茨清澗
日濯足喬林時曝衣終年登險阻不復憂安危蕩漾與
神遊莫知是與非

漁父詞

澤魚好鳴水谿魚好上流漁梁不得意下渚潛垂釣亂
荇時礙楫新蘆復隱舟靜言念終始安坐看沉浮素髮
隨風揚遠心與雲遊逆浪還極浦信潮下滄洲非爲狗
行役所樂在行休

牧童詞

不言牧田遠不道牧陂深所念牛馴擾不亂牧童心圓
笠覆我首長蓑披我襟方將憂暑雨亦以懼寒陰大牛
隱層坂小牛穿近林同類相鼓舞觸物成謳吟取樂須
臾間寧問聲與音

采蓮詞

淺渚荷花繁深潭芰葉疎獨往方自得恥邀淇上姝廣
江無術阡大澤絕方隅浪中海童語流下鮫人居春菽
時隱舟新萍復滿湖采采乘日養不思賢與愚

采菱詞

濁水菱葉肥清水菱葉鮮義不遊濁水志士多苦言潮

沒具區藪潦深雲夢田朝隨北風去暮逐南風旋浦口
多漁家相與邀我船飯稻以終日羹蓴將永年方冬水
物窮又欲休山樊盡室相隨從所貴無憂患

射雉詞

曝暄理新翳迎春射鳴雉原田遙一色皋陸曠千里遙
聞呶喔聲時見雙飛起羃歷疎蒿下韞緜深麥裏顧敵
乃忘生爭雄方決死仁心貴勇義豈復能傷此超遙下
故墟迢遞回高時大夫昔何苦取笑歡妻子

猛虎詞

寒亦不憂雪飢亦不食人人肉豈不甘所惡傷明神太
室爲我宅孟門爲我鄰百獸爲我膳五龍爲我賓蒙馬

一何威浮江一以仁彩章耀朝日爪牙雄武臣高雲逐
氣浮厚地隨聲震君能賈餘勇日夕長相親

雜詩

混沌本無象末路多是非達士志寥廓所在能忘機耕
鑿時未至還山聊采薇虎豹對我蹲鷺鷥傍我飛仙人
空中來謂我勿復歸格澤爲君駕雲霓爲君衣西遊崑
崙墟可與世人違

秋氣肅天地太行高崔嵬猿狖清夜吟其聲一何哀寂
寥掩圭華夢寐遊蓬萊琪樹遠亭亭玉堂雲中開洪崖
吹簫管玉女飄飄來兩師旣先後道路無纖埃鄙哉楚
襄王獨如雲陽臺

效古

晨登涼風臺暮走邯鄲道曜靈何赫烈四野無青草大
軍北集燕天子西居鎬婦人役州縣丁男事征討老幼
相別離哭泣無昏早稼穡旣殄絕川澤復枯槁曠哉遠
此憂冥冥商山皓

東風吹大河河水如倒流河洲塵沙起有若黃雲浮顛
霞燒廣澤洪曜赫高丘野老泣相語無地可蔭休翰林
有客卿獨負蒼生憂中夜起躑躅思欲獻厥謀君門峻
且深踈足空夷猶

酬綦母校書夢遊耶溪見贈之作

校文在仙掖每有滄洲心況以北窻下夢遊清溪陰春

看湖口漫夜入迴塘
深往往纜垂葛出舟望
前林山人松下飯釣客
蘆中吟小隱何足貴
長年固可尋還車首
東道惠言若黃金以我
采薇意傳之天姥岑

使過彈箏峽作

鳥雀知天雪羣飛復群鳴
原田無遺粟日暮滿空城
達士憂世務鄙夫念王程
晨過彈箏峽馬足凌兢行
雙壁隱靈曜莫能知晦明
皚皚堅冰白漫漫陰雲平
始信古人言苦節不可貞

述華清宮

天寶六載冬十月皇帝如驪山溫泉宮名其宮曰華清

上在蓬萊宮莫若居華清
朝朝禮元閣日日聞體輕
大聖不私已精禋爲羣氓

上出蓬萊時六龍儼齊首
長道舒羽儀彤雲映前後
天聲殷宇宙真氣到林藪

昔在軒轅朝五城十二樓
今我神泉宮獨在驪山陬
羣芳趣順動百辟隨天遊

正月開陽和通門緝元化
穆穆睟容歸豈爲明燈夜
高山大風起肅肅隨龍駕

上林神君宮此地即明庭
山開鴻蒙色天轉招搖星
三雪報大有孰謂非我靈

池邊鶴

舞鶴傍池邊水清毛羽鮮
立如依岸雪飛似向池泉
江海雖言曠無如君子前

釣魚灣

垂釣綠灣春春深杏花亂潭清疑水淺荷動知魚散日暮待情人維舟綠楊岸

題太元觀

門外車馬喧門裏宮殿清行即翳若木坐即吹玉笙所喧既非我真道其冥冥

喫茗粥作

當晝暑氣盛鳥雀靜不飛念君高梧陰復解山中衣數片遠雲度曾不蔽炎暉淹留膳茶粥共我飯蕨薇敞廬既不遠日暮徐徐歸

泛茅山東谿

清晨登仙峯峰遠行未極江海霽初景草木含新色而我任天和此時聊動息望鄉白雲裏發棹清谿側松栢生深山無心自貞直

過新豐道中

二十八年有詔種果

西下長樂坂東入新豐道雨多車馬稀道上生秋草太陰蔽皋陸莫知晚與早雷雨杳冥冥川谷漫浩浩詔書植嘉木衆言桃李好自愧無此容歸從漢陰老

泊舟貽潘少府

時潘在後浦

行子苦風潮維舟未能發宵分卷前幔卧視清秋月四澤葭葦深中洲煙火絕蒼蒼水霧起落落疎星沒所遇盡漁商與言多楚越其如念極浦又以思明哲常若干

里餘況之異鄉別

仲夏入園中東陂

方塘深且廣伊昔俯吾廬環岸垂綠柳盈潭發紅蕖上
延北原秀下屬幽人居暑雨若混沌晴明如空虛此鄉
多隱逸水陸見樵漁廢賞亦何貴爲歡良易攄且言重
觀國當此賦歸歟

終南幽居獻蘇侍郎

時拜太
祝未上

暮春天氣和登嶺望層城朝日懸清景巍我宮殿明聖
君常臨朝達士復懸衡道近無良足歸來卧山楹靈堦
曝仙書深室鍊金英春巖松栢秀晨路鷓雞鳴羽化既
有言無然悲不成

中歲尚微道始知將谷神抗策還南山水木自相親深
林門一道青嶂成四鄰平明去採薇日入行刈薪雲歸
萬壑暗雪罷千巖春始看元鳥來已見瑤華新寄言蹇
芳者無乃後時人

卜築青巖裏雲蘿四垂陰虛室若無人喬木自成林時
有清風至側聞樵采音鳳凰鳴高岡望望隔層岑旣言
山路遠復道谿谷深倥佯空中遊虬龍水間吟何當見
輕翼爲我達遠心

田家即事

蒲葉日已長荇花日已滋老農要看此貴不違天時迎
晨起飯牛雙駕耕東菑蚯蚓土中出田烏隨我飛羣合

亂啄噪嗷嗷如道飢我心多惻隱顧此兩傷悲撥食與
田烏日暮空筐歸親戚更相誚我心終不移

同王十三維偶然作

仲夏日中時草木看欲焦田家惜功力把鋤來東皋顧
望浮雲陰往往誤傷苗歸來悲困極兄嫂共相饒無錢
可沽酒何以解劬勞夜深星漢明庭宇虛寥寥高柳三
五株可以獨逍遙

北山種松柏南山種蒺藜出入雖同趣所尚各有宜孔
丘貴仁義老氏好無爲我心若虛空此道將安施暫過
伊闕間晚晚三伏時高閣入雲中芙蓉滿清池要自非
我室還望南山陞

野老本貧賤冒雨鋤瓜田一畦未及終樹下高枕眠荷
蓀者誰子皤皤來息肩不復問鄉墟相見但依然腹中
無一物高話羲皇年落日臨層隅逍遙望晴川使婦提
蠶筐呼兒榜漁船悠悠泛綠水去摘浦中蓮蓮花艷且
美使我不能還

浮雲在空虛隨風復卷舒我心方處順動作何憂虞但
言嬰世網不復得閑居迢遞別東國超遙來西都見人
乃恭敬曾不問賢愚雖若不能言中心亦難誣故鄉滿
親戚道遠情日疎偶欲陳此意復無南飛鳧

黃河流向東弱水流向西趨舍各有異造化安能齊妾
本邯鄲女生長在叢臺

叶

既聞容見寵復想元爲妻刻

畫尚風流幸會君招攜逶迤歌舞座婉戀芙蓉閨日月
方向除恩愛忽焉睽棄置誰復道但悲生不諧羨彼匹
婦意偕老常同棲

日暮登春山山鮮雲復輕遠近看春色踟躕新月明仙
人浮丘公對月時吹笙丹鳥飛熠熠蒼蠅亂營營羣動
汨我真訛言傷我情安得如子晉與之遊太清

空山暮雨來衆鳥竟棲息斯須照夕陽雙雙復撫翼我
念天時好東田有稼穡浮雲蔽川原新流集溝洫徘徊
顧衡宇僮僕邀我食卧覽牀頭書睡看機中織想見明
膏煎中夜起唧唧

田家雜興

春至鷓鴣鳴薄言向田野不能自力作黽勉娶鄰女既
念生子孫方思廣園圃閑時相顧笑喜悅好禾黍夜夜
登彌臺南望洞庭渚百草被霜露秋山響砧杵却羨故
年時中情無所取

衆人處貧賤相與尚膏腴我情既浩蕩所樂在畋漁山
澤時晦暝歸家暫閑居滿園植葵藿繞屋樹桑榆禽雀
知我閑翔集依我廬所願在優游州縣莫相呼日與南
山老兀然傾一壺

逍遙阡陌上遠近無相識落日照秋山千巖同一色網
罟繞溪莽鷹鷂始輕翼獵馬旣如風奔獸莫敢息駐旗
滄海畔犒士吳宮側楚國有夫人性情本貞直鮮禽徒

自致終歲竟不食

田家趣隴畝當晝掩虛關鄰里無煙火兒童共幽閑
枯棹懸空圃雞犬滿桑間須臾農事隙採藥遊名山
但願所采多不言路險艱人生如蜉蝣一往不可攀
君看西王母千歲美容顏

貧士養情性不復知憂樂去年行賣畚留滯南陽郭
秋至黍苗黃無人可刈獲孺子朝來飯把竿逐鳥雀
忽見梁將軍乘車出宛洛意氣軼道路光輝滿墟落
安知負薪者啞啞笑輕薄

楚山有高士梁國有遺老築室既相鄰同田復同道
糗糒常共飯兒孫每更抱忘此耕耨勞愧彼風雨好
蟋蟀

鳴空澤鷓鴣傷秋草日夕寒風來衣裳苦不早

梧桐蔭我門薜荔網我屋超超兩夫婦朝出暮還宿
稼穡既自種牛羊還自牧日旰癩耕鋤登高望川陸
空山足禽獸墟落多喬木白馬誰家兒聯翩相馳逐

種桑百餘樹種黍三十畝衣食既有餘時時會親友
夏來菰米飯秋至菊花酒孺人喜一作善逢迎稚子解趨走
日暮閑園裏團團蔭榆柳酌酹乘夜歸涼風吹戶牖
清淺望河漢低昂看北斗數罍猶未開明朝能飲否

題辨覺精舍

朝隨秋雲陰乃至青松林花閣空中遠方池巖下深
竹風亂天語谿響成龍吟試問真君子遊山非世心

行次田家澳梁作

田家俯長道邀我避炎氛當暑日方晝高天無片雲桑
間禾黍氣柳下牛羊羣野雀棲空屋晨風不復聞前登
澳梁坂極望溫泉分逆旅方三舍西山猶未曛

秋次灞亭寄申大

橘柚植寒陵芙蓉帶修坂無言不得意得意何由展况
我行且徒而君往猶蹇既傷人事近復言天道遠薄暮
入空亭中夜不能飯南聽鴻雁盡西見招搖轉千門漢
主宮百里周王苑杲杲初景出油油鮮雲卷會朝幸歲
正校獵從秋獮念君久京國雙涕如露泣無人薦子雲
太息竟誰辨

晚霽中園喜赦作

五月黃梅時陰氣蔽遠邇煙雲連晦朔菰菜生鄰里落
日燒霞明農夫知雨止幾悲衽席濕長歎垣墻毀曠朗
天宇開家族躍以喜渙汗發大號坤元更資始散衣出
中園小徑尚滑履池光搖萬象倏忽滅復起嘉樹如我
心欣欣豈云已

夏日尋藍田唐丞登高宴集

東望春明門駕言聊出游南行小徑盡綠竹臨清流君
出罷六安居此澹忘憂園林與城市閭井隨人幽披顏
闢衡闈置酒登崇丘山河臨咫尺宇宙窮寸眸是時春
載陽佳氣滿皇州宮殿碧雲裏鴛鴦初命儔良辰方在

茲志士安得休成名苟有地何必東陵侯

同諸公登慈恩寺塔

金祠起真宇直上青雲垂地靜我亦閑登之清秋時蒼
蕪宜春苑片碧昆明池誰道天漢高逍遙方在茲虛形
賓太極攜手行翠微雷雨傍杳冥鬼神中躡踞靈變在
倏忽莫能窮天涯冠上閭闔開履下鴻雁飛宮室低邈
迤羣山小參差俯仰宇宙空庶隨了義歸巖劣非大厦
久居亦以危

同諸公秋霽曲江俯見南山

天靜終南高俯映江水明有若蓬萊下淺深見澄瀛羣
峯懸中流石壁如瑤瓊魚龍隱蒼翠鳥獸遊清泠菰蒲

林下秋薜荔波中輕山萸浴蘭沚水若居雲屏嵐氣浮
渚宮孤光隨曜靈陰陰豫章館宛宛百花亭大君及羣
臣宴樂方嚶鳴吾黨二三子蕭晨怡性情逍遙滄洲時
乃在長安城

貽劉高士別

夙駕出東城城傍早霞散初日照龍闕峩峨在天半壯
哉麗百常美矣崇兩觀俯視趨朝客簪珮何璀璨而我
送將歸徘徊灞陵岸北雲去吳越南雁離江漢伊昔蹈
丘園翩翩理文翰高談閔仲叔逸氣劉公幹每言竹柏
貞常輕朝市玩山畫猿狄靜谿曛魚鳥亂寧止卧崆峒
直云期汗漫聖君旣理歷族士咸炳煥矯首來天地振

羽泛漪瀾元淑命不達伯鸞吟可歎東去姑蘇臺乃過
陟陽館舍轡函關道浮舟滄海畔耳目曠暄涼懷抱盈
悲惋沈沈青歲晚靄靄秋雲換自言永遜棲無復從羈
絆揮手謝知己知已莫能讚

山中貽崔六琪華

恍惚登高嶺徘徊看落日遙想仲長園如親幼安室春
渚菖蒲登山中播穀鳴相思不道遠太息未知情意君
來此地時復疎林薄中夜掃衡門迎晨閉菌閣屣履清
池上家僮奉信歸憂隨落花散目送歸雲飛故交在天
末新知復千里無人暫往來獨作中林士

鞏城南河作寄徐三景暉

初年雨候遲鞏洛河流小搖搖芳草岸屢見春山曉清
露洗雲林輕波戲魚鳥唯言故人遠不念鄉川眇舟楫
去縈迴湍激行奔峭寄書千里路莫道南鴻少

華陰作貽祖三詠

朝行敷水上暮出華山東高館宿初靜長亭秋轉空日
餘久淪汨重此聞霜風淅瀝入谿樹颼颼驚夕鴻悽然
望伊洛如見息陽宮舊識無高位新知盡固窮夫君獨
輕舉遠近善文雄豈念千里駕崎嶇秦塞中

閑居

薄遊何所愧所愧在閑居親故不來往中園時讀書步
欄滴餘雪春塘抽新蒲梧桐漸覆井時鳥自相呼悠然

念故鄉乃在天一隅安得如浮雲來往方須臾

同王十三維哭殷遙

生理無不盡念君在中年遊道雖未深舉世莫能賢
筮仕苦貧賤爲客少田園膏腴不可求乃在許西偏
四鄰盡桑柘咫尺步開牆垣內艱未及虞形影隨化
遷茅茨俯苦蓋雙殯兩楹間時聞孤女號迴出陌與
阡慈烏亂飛鳴猛獸亦以踰故人王夫子靜念無生
篇哀樂久已絕聞之將泣然太陽蔽空虛雨雪浮蒼
山迢遞親靈櫬顧予悲絕絃處順與安時至此乃空
言

新豐主人

新豐主人新酒熟舊客還歸舊堂宿滿酌香含北砌花

盈樽色泛南軒竹雲散天高秋月明東家少婦解秦箏
醉來忘却巴陵道夢中疑是洛陽城

薔薇篇

裊裊長數尋青青不作林一莖獨秀當庭心數枝分作
滿庭陰春日遲遲欲將半庭影離離正堪玩枝上嬌鶯
不畏人葉底飛蛾自相亂秦家女兒愛芳菲畫眉相喚
采葳蕤高處紅鬚欲就手低邊綠刺已牽衣蒲萄架上
朝光滿楊柳園中暝鳥飛連袂踏歌從此去風吹香氣
逐人歸

近體詩

臨江亭五咏

并序

建業爲都舊矣晉主來此而禮物盡備雖云在
德亦云在險京口其地也嗚呼有邦國者有廢
興焉自晉及陳五世遞嬗以今懷古五篇爲咏
臨江亭得其勝槩寄以興言雖未及乎辯士亦
其志也

晉家南作帝京鎮北爲關江水中分地城樓下帶山金
陵事已往青蓋理無還落日空亭上愁看龍尾灣
山橫小苑前路盡大江邊此地興王業無如宋主賢潮
生建業水風散廣陵煙直望清波裏祇言別有天
城頭落暮暉城外搗秋衣江水青雲挹蘆花白雪飛南
州王氣疾東國海風微借問商歌客年年何處歸

古木嘯寒禽層城帶夕陰梁園多綠樹楚國盡楓林山
際空爲險江流長自潏平生何以恨天地本無心
京山千里過孤憤望中來江勢將天合城門向水開落
霞明楚岸夕露濕吳臺去去無相識陳皇安在哉

泊江潭貽馬校書

明月掛青天遙遙如目前故人遊畫閣却望似雲邊水
宿依漁父歌聲和采蓮采蓮江上曲今夕爲君傳

夜觀妓

白雪宜新舞清宵召楚妃嬌童攜錦薦侍女整羅衣花
映垂鬟轉香迎步履飛徐徐斂長袖雙燭送將歸

官莊池觀競渡

落日吹簫管清池發棹歌船爭先後渡岸激去來波水
葉藏魚鳥林花間綺羅踟躕仙女去猶似望天河

霽後貽馬十二巽

高天風雨散清氣在園林況我夜初靜當軒鳴綠琴雲
開北堂月庭滿南山陰不見長裾者空歌遊子嗟

題山中流泉

山中有流水借問不知名映地爲天色飛空作雨聲轉
來深澗滿分出小池平恬澹無人見年年長自清

題陸山人樓

暮聲雜初雁夜色涵早秋獨見海中月照君池上樓山
雲拂高棟天漢入雲流不惜朝光滿其如千里遊

漢陽即事

楚國千里遠孰知方寸違春遊歡有客夕寢賦無衣江
水帶冰綠桃花隨雨飛九歌有深意捐珮乃言歸

寒夜江口泊舟

寒潮信未起出浦纜孤舟一夜苦風浪自然增旅愁吳
山遲海月楚火照江流欲有知音者異鄉誰可求

苑外至龍興院作

朝遊天苑外忽見法筵開山勢當空出雲陰滿地來疎
鐘清月殿幽梵靜花臺日暮香林下飄飄仙步迴

隴頭水送別

相送隴山頭東西隴水流從來心膽盛今日爲君愁暗

雪迷征路寒雲隱戍樓唯餘旌旆影相逐去悠悠

洛橋送別

河橋送客舟河水正安流遠見輕橈動遙憐故國遊
海禽逢早雁江月值新秋一聽南津曲分明散別愁

洛潭送人覲省

清洛帶芝田東流入大川舟輕水復急別望杳如仙
細草生春岸明霞散早天送君唯一曲當是白華篇

張谷田舍

縣官清且儉深谷有人家一徑入寒竹小橋穿野花
碓喧春澗滿梯倚綠桑斜自說年來稔前村酒可賒

藍上芳茨期王維補闕

見王維集

山中人不見雲去夕陽過淺瀨寒魚少叢蘭秋蝶多
老年疎世事幽性樂天和酒熟思才子谿頭望玉珂

田家即事

桑柘悠悠水醮堤晚風晴景不妨犁高機猶織卧蠶子
下坂饑逢餉饁妻杏色滿林羊酪熟麥涼浮壠雉媒低
生時樂死皆由命事在旻天迴不迷

長安道

鳴鞭過酒肆衮服遊倡門百萬一時盡含情無片言
西行千里暝色生寒樹暗聞歌吹聲知是長安路

洛陽道獻呂四郎中

洛水春冰開洛城春樹綠朝看大道上落花亂馬足

春風二月時道傍柳堪把上枝覆官閣下枝拂車馬
洛水照千門千門碧空裏少年不得志走馬遊新市

江南曲

綠江深見底高浪直翻空慣是湖邊住舟輕不畏風
逐流牽荇葉綠岸摘蘆苗爲惜鴛鴦鳥輕輕動畫橈
日暮長江裏相邀歸渡頭落花如有意來去逐船流
隔江看樹色沿月聽歌聲不是長干住那從此路行

同武平一負外遊湖

竹吹留歌扇蓮香入舞衣前溪多曲渚乘興莫先歸

明妃曲

日暮驚沙亂雪飛傍人相勸易羅衣強來前殿看歌舞

共待單于夜獵歸

同武平一負外遊湖

青林碧嶼暗相期緩楫揮觥欲賦詩借問高歌凡幾轉
河低月落五更時

朝來仙閣聽絃歌暝入花亭見綺羅池邊命酒憐風月
浦口迴船惜芰荷

朦朧竹影蔽巖扉淡蕩荷風飄舞衣舟尋綠水宵將半
月隱青林人未歸

花潭竹嶼傍幽溪畫楫浮空入夜谿芰荷覆水船難進
歌舞留人月易低

寄孫山人

新林二月孤舟還水滿清江花滿山借問故園隱君子
時時來往在人間

嚴武

武字季鷹華州人
中書侍郎挺之之子神氣雋朗
敏於見聞弱冠哥舒翰奏充判官遷侍御史至德
中累爲劍南東川節度成都尹兼御史大夫尋遷
黃門侍郎復拜成都尹劍南節度等使廣德中破
吐蕃改檢校吏部尚書封鄭國公

紀事云武年二十二爲給事黃門郎明年擁旄西
蜀杜甫乘醉言不謂嚴挺之乃有此子也武恚目
久之曰杜審言孫子擬捋虎鬚合坐皆笑以彌縫

之房太尉瑄微有所忤憂怖成疾李太白作蜀道
難爲房杜危之也

古體詩

題巴州光祿寺楠木

楚江長流對楚寺楠木幽生赤崖背臨谿插石盤老根
苔色青蒼山雨痕高枝開葉鳥不度半掩白雲朝與暮
香殿蕭條轉密陰花龕滴瀝垂清露聞道偏多越水頭
煙生霽斂使人愁月明忽憶湘川夜猿叫還思鄂渚秋
看君幽靄幾千丈寂寞窮山今遇賞亦知鐘梵報黃昏
猶卧禪牀戀奇響

近體詩

酬別杜二

獨逢堯典日再覩漢官時未效風霜勁空慙雨露私夜
鐘清萬戶曙漏拂千旗並向殊庭謁俱承別館追斗城
憐舊路鍋水惜歸期峯樹還相伴江雲更對垂試迴滄
海棹莫妬敬亭詩祇是書應寄無忘酒共持但令心事
在未肯鬢毛衰最悵巴山裏清猿醒夢思

寄題杜拾遺錦江野亭

漫向江頭把釣竿懶眠沙草愛風湍莫倚善題鸚鵡賦
何須不着鷓鴣冠腹中書籍幽時曬肘後醫方靜處看
興發會能馳駿馬應須直到使君灘

巴嶺荅杜二見憶

卧向巴山落月時兩鄉千里夢相思可但步兵偏愛酒
也知光祿最能詩江頭赤葉楓愁客籬外黃花菊對誰
跂馬望君非一度冷猿秋雁不勝悲

軍城早秋

昨夜秋風入漢關朔雲邊月滿西山更催飛將追逃虜
莫遣沙場匹馬還

鄭虔

虔鄭州滎陽人天寶初爲協律郎或告其私撰國
史坐謫十年還京以不事事更爲置廣文館以虔
爲博士自寫其詩畫以獻帝署曰鄭虔三絕後貶
台州司戶參軍

近體詩

閨情

銀鑰開香閣金臺點夜燈長征君自慣獨卧妾何曾

崔成甫

成甫開元末為陝縣尉李白澤畔吟序云澤畔吟者逐臣崔公所作云代業文宗早茂才秀起家校書蓬山再尉關輔中佐於憲車因貶湘陰流離沅湘摧悴草莽忠憤義烈形於清辭其怨者之流乎

近體詩

贈李十二白

我是瀟湘放逐臣君辭明主漢江濱天外常求太白老

金陵捉得酒仙人

奚賈

賈常建同時人

近體詩

尋許山人亭子

桃源若遠近漁子棹輕舟川路行難盡人家到漸幽山禽拂席起溪水入庭流君是何年隱如今成白頭

李康成

康成天寶中與李杜同時撰玉臺後集

古體詩

采蓮曲

采蓮去月沒春江曙翠鈿紅裊水中央青荷蓮子雜衣
香雲起風生歸路長歸路長那得久各迴船兩搖手

自君之出矣

自君之出矣絃吹絕無聲思君如百草撩亂逐春生

御定全唐詩錄卷第十七



